


MAASI ANKHALA

VOOHIMALA VAMWALA

 Hiyo ninnixukhuru voosiis'ula mwaha wa Mukhalelo w'Apwiya Muluku, apacenyere mwa miteko soopacerya enivahaka mutthaka, ori—orinaahu “owiriyana, okhala oottittimiha” oholo Waya, okhala wira Awo ahaana etthu wira anihimeerye. Miyo kookupali wira Awo animwiira ele Awo ahimyaaya. Awo okathi wothene annimaliherya Masu Aya. Nto siiso hiyo ninnixukhuru othukumana vamosa, akumi, ni epantte ela ya Ohimala voosiis'ula, ni oweriya waakokhorela-tho Apwiya, ni othukumana vamosa ni wiiwa sa Yaawo. Mwaha wa yeeyo enthukumanelaahu, mwaha wa niwoko nenla.

² Vano, ntoko wira koomuthikileiha Munna Neville, voohiweherereya, olelo, mwaha wa yooloha emosa kaarinaaka. Wira . . . Miyo kinnaamini e . . . Miyo . . . moolohani. Kinnaamini wira Muluku onnivara muteko ni atthu mwa sooloha. Vano kaahikhalana yooloha yootikiniha vanci-ene, nsuri ohiyu. Wira, miyo kaarowa kittharaka ntumuxa, ntumuxa nlo, kirowaka nipuro n'olya vaavo kaarowaaka o—olya y'ohiyu. Nto kaahoona wira, okathi waattamelaaka nipuro nlo, awo yaarumiha muusika, nikhuru n'alipa oorumiha naarumiha muusika, ni apankwe, ni yaatthekulihaka atthu okathi awo yaalyaaya. Ni yaahikhala etthu ya yeeyo yahaakisivenle, tivo miyo kaaxeremalyaaka etthu iyo. Vano kaahikumana ni mutthu mmosa aawela ntumuxa. Vano miyo khuweha, nto atthu anci-ene yaawela ntumuxa erwaaka nipuro nenla n'olya-vo. Masi khwiira ntoko kaahaasusa, khurukunuwela moono woolopwana, ahiiso, woothiyana.

³ Nto mwa enamuna emosa, vathi mukhatoni, kaaniwerya woona etapernakulu. Kaahiiwa nsu na mutthu, wira, “Mukumane ni Munna Branham vamakumano khata. Owo onookhuruwa okhuma vantumuxani vale. Ni mmuleele etthu khata ni khata.” Nto miyo kaahaakuva wira kipiye vamakumano va.

⁴ Nto okathi mutth'uwo orwiiyaawe, aari Munna Neville aawanre efaato awe yookhwila, ooneya voolikana siisaale sinooneyaawe okilaante-ene vale voosiis'ula. Nto owo khwira, “Munna Branham, mwaarowaka okhala opooma,” khwira, “yaamukhala e—etthu yooreera wa nyuwo orwa nno, okhala wira Munna Hank . . .” Vano, Munna Hank, mmosa paahi miyo kimmusuwelaaka, ti Munna Henry Carlson, hiyo nimmwiihana Hank. Khwira, “Owo pooti wuupuwela wira yaahitikiniha

nyuwo ohithotola-tho etapernakulu vakhala wira munrowa okhala mpooma, wala mmuttettheni mahiku vakhani.” Miyo khuyenya.

⁵ Nto, mwa yeeyo, kaahoona otikiniha vakhani. Nkaatthuna wiikeliha okathi uwo wa esumana, mpakha onvekela Munna Neville vakhala wira aahikhalana etthu yoosuwanyeya ya voosiis’ula, wa ekereja. Vano owo aari ooreera murima, ntoko kweekwe, khwira, “Murwe.” Vano, hiyo khurwa. Miyo khimulikarela nsana oxekuwa, nto kirwiiye voosiis’ula, voohiweherereya wa khula mmosa a hiyo.

⁶ Vano kinnaamini wira yaamukhala etthu yooreera, yoopacerya, wa miyo wo—wooleeliheryani itthu kamosa-kamosa. Miyo, voowupuweleliwa, ka mutthu mmosa ootikiniha saana w’atthu anci-ene. Ni miyo ka ootikiniha wa yoomi, nave. Okhala wira, miyo kimpavela otthara ohoolela wa Erooho Yoowaarya, oratta-enexa ntoko sinweryaaka. Nto eyo enninikhaliha hiyo ootikiniha, moone. Hiyo ninniira itthu hiyo—hiyo vekeekhai ninkilaathi-ahu ni oxankela imaara sikina, “Kiirenle-ni etthu ile? Kiphiyenrye sayi wira etthu ile?” Ni okathi ene yoowo nyuwo pooti wupuwela wira mwiirale etthu ene yeeyo mwahaarinaanyu wira. Masi nyuwo mwakhalaru oovilela paahi, ni okhalana waamini, ni okupali wira Muluku ohooholelani wira mwiire yeeyo, munoosuwela wira enookhumela oratteene. Munnona? Ni imaara sinci-ene hiyo ninnoonaka wira ti yeeyo. Ni miyo koosuwela wira Munna Neville ohoona eyo, imaara sinci-ene. Vano ahooleli ni atthu a muroohoni annisuwela eyo.

⁷ Woovira okathi mwa makhalelo aka wira... Voohithepya, okhuma okathi waaryaaka mmiravo paahi, nkinatoko woona weettiheriwa voowooneya wira kaahaana okhala o—oJeffersonville. Kweekwe enikhalaka ephepele munikwantuni, wa miyo ophavela okhala wenna. Yoopacerya, mukhalelo wa okathi onnivaanyihana ni miyo voochifayi. Etthu ekina, enkhala ntoko okhala onyohowa wa erooho.

⁸ Nyuwo mwatthika khuweha nipuro nlo nno, waahikhaleru woohononiwa okathi wo osarya wa maasi, yookhala ewarakha mwaha wa yeeyo, kaarinaaka, mwa naanaano kiitthaneliwaaka mmutekoni, khupacerya wiitthokiha wira kirowe. Nto Munna George DeArk ni miyo. . .

⁹ Ni mai awe Munna Graham Snelling, Munna Hawkins yoowo oniholela nipuro nintumihiwa patarooya oNew Albany, ni anci-ene a atthu, yaahikumana ni miyo ota wa nipuro naamukhaani na mavekelo nno. Ni hata yaahihimya wira, kaahanleru, awo yaamuphimelela yolya ya an’aya, wira—wira eteke etapernakulu, wira ehikhaleke ooroihiwa nipuro nnipuro.

¹⁰ Vamwiiwalyaaka mai ule mwaamukhaani, onvarenle-ene mwaana mmosa mmatatani nto mukina mmoononi mwawe,

ohimya wira aahilikanana waaphimelela an'awe vameesa, wira etekase opuro awo yaarowaaya oweriya okhala ni okokhorela, eyo yaari yootepa wa miyo. Tivo Munna George ni miyo khuthukumana khulakela wira naamukhala niteke etapernakulu.

¹¹ Nto okathi etapernakulu etekiwaaya, eyo kweekwe yaakhala ntoko... Voosiisu waavaherenryaaka etapernakulu, yoowoona yaahirwa, yeeyo elempwe ni vanlukuni noolipiha vale, okathi Erooho Yoowaarya yaakihimenryaaya, "Ela kehiyo etapernakulu anyu." Munnona? Vano miyo kaahikoha vatthu etapernakulu aka yaaryaaya, nto Owo khukihela vathi v'erimu yooripelela yoowaarya. Vano nto Owo khwira, "Nvare muteko wa namalaleya," ni siiso, ntoko munsuwelaanyu. Yolempwa hata muliivuruni.

¹² Itthu sothene iyo vamosa. Nto nihiku nimosa okathi waathikilaaka malaxi vaniyateni iwe vaavo Munna Wood onkhalaawe vano, ni amaathi aka yaakhalaka weiwo okathi uwo; miyo khukilaathi vaxikattani ya ottuli, exikatta yaamukhaani ya kokotto, kaatenke aka nipuro nla naamukhaani vale na amaathi aka. Nto awo yaari ntoko namakhaliherya a okereja okathi yoowo, ereheryaka. Nto voosuwanyeya ntoko mutthu saakhanlyaawe olavulaka, Nsu nimosa khulavula ni miyo, khwira, "Miyo nkikhanle wooreerihani mwakhalaru weno. Muhaana wiivalaaniha n'atthu anyu ni nipuro nla." Ahe, miyo, eyo yaahikikhera kapatti-kapatti, mwa esumana emosa wala ovikana.

¹³ Voohihyererya, okathi wothene, Etthu emosa ennikilopolaka, "Murowe, murowe. Murowe mwakhale onkela nsuwa. Muroweke onkela nsuwa." Ahe, miyo... Eyo okathi wothene ennikihaaxaka. Ni enikhala ntoko khula okathi...

¹⁴ Vano, miyo kaahilakela mmuruni mwaka wira esuman'ela kaanvava kirowaka oTucson, weiwo kaarowaaka orentteri empa, wira kikhale weiwo eyiita ela; wira kaahale anamwane muxikola, enipacerya Setempuru. Kaahikhalana nipuro. Kaahivahiwa nipuro wu. Masi yookhala etthu eni... Ni—ni karowaru...

¹⁵ Etthu ekina kaatthunaaka ohimya. Okathi vakhani nihinatthi oteka empa ela nno, empa ya pasture, vaavo varyaaya vano, miyo nkaatthuna oteka vaavale. Amama aya amwaar'aka yaahuuluvula. Ni awo hata yaahinla mwaha wa yeeyo, awo khwira, "Nkinwerya waahiya amaama weno, kisuwelaka wira awo ahuuluvala, khino pooti ohikhapeleliwa." Ahe, miyo kaahitthokelela yeeyo. Kinnisuwela saana. Owo ti mai awe, ni mai mmosa paahi otonko awe okhalana, ahiiso onrowaawe okhalana. Vano, miyo khutthokelela eyo. Vano miyo—miyo kaahaavekela Apwiya, miyo khwira, "Pwiya, okhalaka wira khininkisivela nipuro nene," Miyo khwira,

“mukikurunuxe murima. Kinoorowa nipuro pi nipuro Nyuwo muntthunaanyu wira kirowe, nipuro pi nipuro. Masi miyo nkinthuna waariipiha murima amwaar’aka, waakumiha nno, waaroiha elapo y’emalapo weiwo awo ahimmusuwelaaya hata mutthu. Nave nto miyo kinookhumaka okathi wothene, khula enamuna. Mukikurunuxe murima okhala va ni yaawo.”

¹⁶ Nto vano, okathi ame aya akuxiwaaya, orowa Movuwani, vano va onoorwa-tho otthuna weiwo, moone, wira kirowe. Nkinsuwela etthu yo wira.

¹⁷ Vano nto nihiku nlo okathi mwiiixuttiho ola axinna yaapacenryaaya, miyo kaaheemela vapulpitu emaara yookiserya kaaryaaka vaava khoolelani wira nkaarowa okhala vapuwani okathi owo wiiraaya okelelaka ohoolo. Tivo, axinna vooreera murima khulakiherya yothene ele. Sothene ti soolakiheriwa. Muhina mwa iwoora miloko miili ni xexe, yaahimala.

¹⁸ Vano eyo ennikitthukulela vapuwani emaara ekina. Miyo nkinsuwela etthu yo wira. Miyo nkinsuwela epantte xeeni y’orukunuwela-wo. Kihaavekela Apwiya yoowoona. Kihaavekela Awo wira ekileele etthu yo wira. Masi Awo anookihiya paahi kilipelelaka.

¹⁹ Vano, nsana ohiyu okathi waakumihalyaaka anamwane othene, amwaar’aka ni othene, okhuma owaani, kiivahererya w’Apwiya Muluku. Vano miyo khwaahimeerya Apwiya Muluku, “Nyuwo mwakireeriharu ephiro enrowaaka, miyo kinimoorumeelani. Masi Nyuwo muhaana okooniha nipuro n’orowa, ni moota w’orowa, ni etthu yo wira.” Tivo, miyo kiihivahererya w’Apwiya. Ni mu—ni muteko ni sothene, miyo koovahererya w’Apwiya. Ni miyo khwira, “Khula nipuro Nyuwo muntthukulaanyu, etthu p’itthu Nyuwo muniiraanyu, miyo kinimweetta vaavo. Mpakha Nyuwo otthukula ephiro, miyo kinootthikela kirowaka paahi ntoko siryaaka mpakha Nyuwo otthukula ephiro.” Vano kihaavekela wira akhalihe yoowooneyexa kihikhale oothepiwa nto, maana tthiri kinnaamini wira niri vamakumanoni va etthu wira yiiraneye.

²⁰ Kihiiwa wira yoolaleeriwa voosis’ula va ni Munna Neville, wala oosuweliha ni miyo kaahisuwela wira yaari—yaari elaleeryo y’eprofeta owo aahimyaawe. Vano, tivo, miyo kihooevekelani nyuwo othene, ni kintthuna wira nyuwo othene mukivekelele, wira Erooho Yoowaarya ekihoolele oratteene nipuro orinaaka orowa, etthu erinaaka wira, wira kihivonye.

²¹ Moone, imaara sinci-ene, atthu anuupuwela wira yoovaha y’oprofeta, wira Muluku paahi oniira “Kinimookuxani *va*, kookhaliheni *va*. Vano murowe *va* paahi.” Ni Owo khooleleni itthu iya sothene. Aahimye-ru, vano waamini xeeni wo oxintta mwaarinaanyu? Munnona? Moone, nyuwo, Owo onnoohiyani okhala meekh’inyu onvikana mutthu ti mutthu mukina. Munnona? Nyuwo othene pooti okirweela ni ovekela itthu

kamosa-kamosa, ni Owo khonavonyeke owaakhulani. Ti yeeyo. Ayo. Masi miyo pooti onvekela Owo itthu wa yoomi, ni imaara sinci-ene Owo onikihiya mmansaka, moone, onookihiya paahi okelela ohoolo mwa yeeyo.

²² Kookhalana itthu vano kirinaaka olokiha yoomi, ni ithanlelo kirinaaka wira. Nto ela etthu y'ekumi saana, mpakha kihikhanlyaaka wiiraka mpakha okupali wira ti Yoowo onlavula ni miyo. Ni miyo—miyo...Owo khonrowa okivaha yoowoona. Owo onookihiya paahi mmansaka. Tivo miyo kiryaaka ntoko ekwaasuni, ntoko, voosiis'ula, miyo—miyo nkinsuwela epantte xeeni y'orowa. Vano, miyo koovahererya w'Apwiya.

²³ Ko—koonale nto ntoko wira, oloha eyo, kaahaana otthikela va otapernakulu ni omukhaliherya Munna Neville mpakha etthu ekina wiiraneya mphironi. Tivo, miyo kinookhala vaava.

²⁴ Koomukoha Munna Neville okathi vakhani ovinre, "Ekereja eneetta sayi?"

Nto owo khwira, "Vooreera."

²⁵ Nto siiso miyo kinniwa wira nlelo mookhalana soovaha sa erooho ni itthu eriyari anyu, seiyo sinvara muteko, soovaha s'eprofeta, ni—ni olavula ilavulelo, ni otaphulela ilavulelo, yeeyo niwalyaahu okathi vakhani ovinre. Vano itthu iyo sinnilipiherya ekereja, ni vanci-ene.

²⁶ Masi miyo kuupuwela, khino ohiy'ula pooti, Munna Neville...Erooho Yoowaarya yaahineettiherye etthu yoovirikana, ohiy'ula kaatthuna kikhalane e...Nyuwo othene, muhinatthi okhuma voosiis'ula, wira mulepe yookoha mpwehe va, yookoha mmuruni mwanyu, wira nisuwele ele ekereja enuupuwelaaya. Eyo p'inamuna mapastore arinaaya yo osuwela vekeekhai etthu eri mmurimani mw'atthu. Ni khula mmosa a nyuwo orina yookoha, mulepe mpwehe vasulu va. Mwaahikhalane ekapatti y'epaphelo wira—wira mulepe-vo voosiis'ula, vano mulepe ohiy'ula, vahilekenle. Tivo, kaatthuna kikhalane okathi munci-ene sinweryaaka, mwa seiyo, wira kiwehe ni kiwaakhuleni ni Soolempwa.

²⁷ Vano Apwiya yatthuna vale, wakhala otthuna wa Muluku, miyo koohimya nuulumo va woohikhala khalayi, wira kaatthuna woolavulelani Ikanyeryo thanu na piili sookiserya sa... Wiisuupulula. Vano hiyo...nkaawerya omaliherya Ikanyeryo iye mwaakha yoola, okhala wira entthuneya okhuma kapiitulu 6 ya Wiisuupulula, mpakha—mpakha ekapiitulu 19, wira nimalihe Ikanyeryo iyo. Masi soopacerya tthaaru wala xexe saya saamuweryaneya waakhuliwa ohiyu umosa, kinona wira, khula Ekanyeryo ohiyu umosa.

²⁸ Vano, hiyo naiwa-ru oratteene, moone, vaavo hiyo neemenlyaahu-vo Eliivuru ile ya Wiisuupulula, vaavo Ekereja yaakuxiwaaya orowa Movuwani, vano ekina eniwaasa aYuta, kahi ni Ekereja nnakhala. Ninaasiwa nloko na aYuta. Tivo

nahaana otthikela vathi va, okhuma Okuxiwa w'Ekereja, n'ukuxa. . . Hiyo ninnoona va etthu eniiraneya okathi ene yoowo wa Ikanyeryo iye, ni okathi wa Ekereja y'Amalapo. Ekereja eniira eronweene; nto ni nloko na Isarayeli, enookhuruwa-tho ni omuruuha Isarayeli okhuma okathi waahiyalyaaya, mpakha okathi wa vano; nto Mesiya onoorwa, okathi awo anrowaaya omwaakhela Mesiya.

²⁹ Vano munniiwa? Ekereja enooroihiwa osulu. Muluku ovanre muteko toko ni Ekereja, Okathi wa Ekereja. Hiyo nihoona eyo. Vano Ekereja enoowelihwa Movuwani. Vano Erooho Yoowaarya enoottika n'umwaakhela Isarayeli, ntoko nloko nimoso. Ni enooruua mpakha va, okathi Niira n'Othela niniiraneyaaya, vano nto enimwaaruha-tho Awo wookiseryani w'okathi yoowo. Kinookhalana ekwaaturu aka, nto kinoowerya okweretha ni wiixuttiha, okathi uwo waphiyaru. Vano Apwiya anoottika ni Mwaakameliwa, nto Isarayeli onoomoona Owo. Ni, oh, okathi xeeni onrowa okhala!

³⁰ Vano, nihinatthi oluttaniha eyo oratta-ene, nookhala nisomi nuulupale ninaakwattula mateyooloku ni anci-ene, ni axuttihi moovirani mwa okathi, ni atthu a Ekereja ya Kristu n'ale anrwa wiiwa yeela, eyo ti, Isumana Miloko Mithanu na Miili sa Daniyeli. Nookhalana. . . Khanikhanle okelelaka-tho ohoolo mwa Wiisuupulula mpakha nimuluttanihe Mwaakameliwa ni Isarayeli vamosa ni Isumana Miloko Mithanu na Miili sa Daniyeli. Nto khino, Muluku atthuna vale, Owo alavula-ru ni miyo ohoolo, wira kilavule vakhani sa Isumana iya Miloko Mithanu na Miili. . . ahiiso, kahi Isumana Miloko Mithanu na Miili, masi Ikanyeryo thanu na piili sookiserya. Vano Ettiminku enrwa, kinoophavela okuxa Isumana Miloko Mithanu na Miili sa Daniyeli, Ettiminku enrwa, Apwiya yatthuna vale. Vano nto eyo enoottukula nipuro nto, vakhala wira Awo anooneettiherya, wira nipacerye ikina. Ahe, ninoosuwela okhuma okathi yoowo.

³¹ Munna Neville ni miyo ninrowa ovaraka muteko vamosa mwa yeela, ni wira sothene hiyo ninweryaahu wa mureerelo w'atthu.

³² Vano, nitthikaka khula okathi, ninnaavekelela aretta, okathi wothene ninnitthapela wira yeeyo. Ni alakela kinimwiira khula muthukumano, atthu yawereiwa, waavekelela.

³³ Miyo nkinthuna okhalana hata olamula sa mmurimani. Moone, vano ela t'ile yaakhumelenle. Miyo koophavela. Ni koosuwela wira kihira itthu sikhanelle soovonyeya; masi kinniphavelaka okhala vakhiviru ni Muluku, okathi wothene, wa Muluku, ti siiso soowoona iya saarowaaya okhumelela, moota saarowaaya okhumelela. Hata atthu saarimeenle itthu, annikiihana, annikivekela wira kirowe kaavekele Apwiya, kikohe nipuro saaryaaya-vo. Ntoko Yesse yaamurimeenle apuuru, vano amiravo ale khurwa omphwanyana profeta, nto

owo khwaaleela wira apuuru yaahitthikelasa owaani. Itthu siiso, yeeyo ekhanle yoolikana oratta-ene. Masi enkhalka yinci-ene, athu anci-ene. . . Kahi mmuttettheni ntoko ola; ti ya mulaponi mothene, moone. Tivo enikhala, enookikhaliha oohaaxeya, vano nto ennookhalihani oowuukhuleya okathi wothene, mpakha ophiya nipuro. . .

³⁴ Nto ti yeeyo yaawiirihale axinna opacerya mwiixuttiho, wira miyo kaari Pwiya Yesu Kristu oowiipaka erutthu. Ni hiyo noosuwela wira eyo yaamuhonona Muteko ene kapatti-kapatti, n'uruuha oveehiwa wa Kristu ni sothene. Munnona? Tivo mwaha wa yeeyo kaarinaaka waattikinya saana wira ahiye naanaanoru, wira esuwele wira eyo khiyaari ya Muluku, yaari ya xetwani. Munnona? Ni awo athu ooreera murima. Ni eyo yaahooniherya wira athu ale aayariwa vasya ni Erooho ya Muluku, okhala wira, okathi awo yoonalyaaya Ekeekhai ni Soolempwa, awo yaahitthikela wa Muluku, vekeekhai, moone, naanaanoru. Vano, eyo yaahooniherya wira aari Satana eereryaka wira etthu n'athu; awo othene yaari athu ooreera murima, aKristu.

³⁵ Ni yaahiwiiriha anci-ene aya okiirela, "Munna Branham, hiyo ninnoororomelaxani vano ovikana sitonko ahu."

³⁶ Okhala wira moone, etthu, ni yoovaha Muluku okivahalyaawe, xeeni kaakhanly'aka wiiraka ni yeeyo? Opuherya elapo munawoni mwaka, ahiiso, athu. Ele eniihanaahu *elapo*, kahi "kosmos" va, ma—malaxi wira epahiwe ni siiso. Kinaahimya aKristu, mulipa-oowaamini eekeekhai, okhanle ekereemi ya e. . . Naalavulaka sa *elapo*, hiyo ninlaleerya sa athu "ooyariwa vasya," ti yeeyo enlavulaahu, elapo. Kahi athu othene iwo tu, okhanale olumwenku woonanara ni woottakatta onkhalaahu-mo, eyo paahi—eyo paahi etthaya ya mulaponi entthika. Miyo kinlavula mwaha wa aKristu ooyariwa vasya, athu akhanle aKristu eekeekhai.

³⁷ Kinwehereya wira mulopwana mmosa akihimiyane mulattu-tho mwaha wa etthu. Mutthu mmosa aahikirweela woohikhala khalayi, nto khwira, "Wuupuwela paahi, wira Kristu aahisenyerya vathi, ni maara Awe, khupaka mattakha ni khoottiha mmaithoni mwa mutthu." Khwira, "Etthu xeeni yoonanara, yoottakatta yaari ile, Owo aasennye awe, ni maara Awe, mwaano mwAawe! Moota yaaryaaya yonyala, osenyela etthaya, ni opaka mattakha a etthaya khuhela mmaithoni mwa mutthu."

Miyo khwira, "Masi owo aahitthika oonaka." Moone, ti yeeyo.

³⁸ Nto mulopwana yoowo! Awo aatthukula nipuro nimoso na epwitipwiti iwe waattamela owannyaka, moosuwela, etanki ya maasi moorapelela. Ni—ni mulopwan'owo ookhalana ettikitti ya khula mmosa wa an'awe wira erowaseke iwe orapelela mutankini mme. Ni owo ni amwaar'awe annirowasa, nave,

mutankini mme. Mukilevelele, axirokor'aka. Masi athiyana ale arapelelaka mme, oophiyaka emiya, wala imiya piili, khula nihiku; athiyana, soonanara iyo sothene n'itthu siiso, ni athiyana olelo, ni erapasaka mmaasini mme, soonanara iyo ni ottakatta mwaano mwaya, ni emiryaka ni yaumulaka. Kintthuna paahi wira owo akihimiyane mulattu, moone.

³⁹ Awo khwira, “Va—vaakhanle wira Kristu ookhala olelo, awo yaamunvara emutthukwele mwaha wa etthu ile ya onyala.”

⁴⁰ Ankhi *eyo?* Kookupali wira munoovara enihimyaaka. Awo anookela mutankini mme moorapelela, ni anci-ene aya ni iretta, musekeneke, ekisonono, ni sothene sikina, mwemme mwene. Nto esenyaka mwaano mwaya paahi, ni itthu sothene siiso, ni yiiraphika mwemmo siiso. Nto eyo ti yooratta, khweeli?

⁴¹ Tivo, oh, wulu, nihiku nla ninkhalaahu, munna mulopwana, nruthiyana! Ola okathi wa Orwa w'Apwiya! Ni Ekereja erina nrromelo mmosa, nto iwo ti Orwa w'Apwiya.

⁴² Ahe, nkinwerya weemexa itthu iyo; khivantthuneya. Bibilia aahihimya wira iyo saamwiiraneya va. Nkinwerya weemexa. Masi kintthuna nsu naka nikaravariwe Wirimu, wira miyo kaari oovirikanya eyo, waphiyaru okathi wa Olamuliwa. Miyo kaahivirikanya yeeyo.

⁴³ Miyo nlelo kinnaamini wira Bibilia ola ti Masu a Muluku. Vano khiivo etthu ekina molumwenkuni, yoovirikana ni Yoowo, enwerya omweemexa Owo. Masi Bibilia ola va, ela Ekeekhahi, ala Masu a Muluku. Tivo vano nrowe paahi nipurule awihu—awihu—matthanka ahu, ni nilipiherye nankura okathi vakhani opatari iwo wa murettele na Nthyawelo na Omumula. Nto—nto ninooowerya ovenxa matthanka mpakha nipuro nlo, masi nrowe nitthukele nankura vano ni niwiryane Nsu na Tith'ihu a Wirimu okathi Owo onrowaawe olavula ni hiyo mwa Masu Awe, hiyo ninnirromela, olelo.

⁴⁴ Nto olelo ohiyu, vano, nyuwo mulikanyihe khula yookoha yaamukhaani erinaanyu. Vano, ehikhale etthu enrowa omutthekela mutthu. Mwaira-ru yeeyo, vano eyo...Miyo nkaarowa waakhula eyo, opacerya wene, moone. Masi nyuwo, *etthu emosa*, pooti wira, “Ahe, vano, miyo kaira etthu khata, Muluku onihimya wira nihaana wira yeela?” Wala, moosuwela, sookoha sikhaani vamurimani vanyu. Wala, “Hiyo nookhalana soovaha sinvara muteko mwa hiyo, Munna Branham, ni naahaana ovarela muteko enamuna *ela* wala enamuna *ele?* Wala, niireke exeeni?” Etthu kaakhanlyaaka owaakhulakani mwa Soolempwa, moone. Mulepe etthu yaamukhaani. Kaamutthapela. Nto yaahikhale etthu, vano kinookuxa mwaha mmosa wa enamuna emosa paahi, koolaleeryeni olelo ohiyu, Apwiya yatthuna vale. Ela Ettiminku, ni miyo kinnikhalaka . . .

⁴⁵ Ettiminku evinre kaahikhuma kirowa owannyawe Munna Cauble. Vano kaahiiwa esiinu ila ya ekereja erumaka, nto

miyo kaaheetta nno ni nno vaniyateni. Miyo nkaawenrye ovilela. Eyo yaari yothene. Kaahiwiwani, vano miyo—miyo—miyo kaahaana orwa.

⁴⁶ Tivo vano nrowe nuurame muru vano nilavule ni Mpattuxa ahu, vano nto mwa nuulumo na mavekelo. Ookhala orina yoovekela y'omeekha? Nvenxe matata paahi, mwiire paahi, "Miyo..." Musuwelihe paahi. Muluku onnisuwela eri vamurimani vanyu. Vano mukhalane yoovekela anyu mmuruni mwanyu paahi.

⁴⁷ Muluku Oowaaryaxa, Yoole mpattunxe Wirimu ni vathi ni Masu a mwaano Mwanyu, ni miyuupuwelo sa mmuupuweloni Mwanyu, hiyo nnoorwa Ohoolo Wanyu, mwa Yesu Kristu, Pwiya'ahu, wira nooxukhuruni Nyuwo mwaha wa sothene Nyuwo munniirelaanyu. Ni hiyo ninnooxukhuruni vanci-ene Nyuwo, Pwiya, voosiis'ula, osuwela vathu vaniphwanyaneyaahu, osuwela nipuro hiyo nryaahu voosiis'ula, ni wahala a okathi, ni ohoolo onoorwa. Nisuwelaka olelo, wira ni mahala a Muluku, wira hiyo noorapihiwa Mphomeni ya oKalvario, wira noolikana, ni waamini mmurimani mwahu, wira nikumane ni Yoowo vaakhanle wira Owo aamoorwa olelo. Hiyo naamwiira, "Nnakhala vo, murwe, Pwiya Yesu."

⁴⁸ Ni hiyo ninnoona etampi ethukumanyeyaka, mpakha enkhalaaaya ntoko olumwenku onooveveleya mwaha wa ekumulanelo ya etampi. Moota soowurya ni omweetta cuuku, ni meera, ni epwitipwiti, ni, O Muluku, soonanara, ni ohifayi ni ottakatta w'atthu. Ni moota awo, vaakhanle wira yaamuwerya paahi osuwela, Pwiya! Atthu awo annisuwela, yaawo aniiwariha siiso ikuwo iye sikhaani soohifayi, ni okhumela iwo mphironi, awo annisuwela wira awo kahiyo hat'etthu woohikhala axikokho ni ntthupi, wira khino mwa esumana ekina axikokho anrowa okhuuraka erutthu iyo awo anttittimihaxaaya? Awo annisuwela wira axikokho anookhuura, nto munep'aya onookhala nipuro nlo mwa Ohimala ehikhalanne Muluku, ehikhalanne Kristu, oohikhalana nrromelo, epwinaka mwa ehirromelo moowiixa, wira emalamalihiwe paahi wa Orwa Wawe? O Muluku, munivahe masu a—a olopola, wira hiyo nilopole khula munepa wa ehasara ela awo anaattamelaaya.

⁴⁹ Mukhale ni hiyo olelo. Munivahe "moolumo a akhili," ntoko Salomoni saatonko awe ohimya mwa Miruku, wira nikhale "anamateka oosuwela," wira nikhale "amakhampusi a muthukumano ola." Ni ninvekela, Pwiya, wira okathi omphavelaahu moolumo oohimya, akhale—akhale miteko sooreeraxa sinrowa ovara murima okhanle wootthunaxa va voosiis'ula.

⁵⁰ Hiyo khanirwiye khuthukumana vathi va nipatho nla nooviha olelo, wira nooniwe paahi, masi nirwiye va okhala wira ninnoophentani Nyuwo, ni okhala wira hiyo ninthuna owiiwani

Nyuwo. Nyuwo mwa Namaphenta ahu hiyo onimphentaahu, ni ninthuna wiiwa Masu ankhuma wa Nyuwo. Hiyo ninnixukhuru mwaha wa ele hiyo niwalyaahu. Eyo enookhala okathi munciene ni hiyo. Vano munivahe ekapatti Nyuwo erinaanyu wa hiyo olelo, okathi onthikelaahu noolipelelakani Nyuwo. Hiyo ninvekela mwa Nsina na Yesu, ni mwaha wa Yoowo. Amen.

⁵¹ Vano ti... [Munna mmosa muthiyana onlavula ilavulelo, munna mmosa mulopwana onnitaphulela—Mol.]

⁵² Hiyo ninnixukhurela ittottopelo iya sa Erooho, sinnileela ni sinnilopola wira niwehe Masu khino Erooho Yoowaarya enrowaaya onileela hiyo olelo. Ni hiyo khaninsuwela oratteene etthu Owo onisukenryaawe, masi noosuwela wira ehaana okhala etthu Owo onrowaawe oruuha. Khino yookhala yookoha eri mmuruni mwanyu, Owo onrowaawe olavula ovira mwa yeeyo. Owo pooti olavula yeeyo Mmutthakani vosiis'ula. Owo pooti olavula eyo olelo ohiyu vamutekoni w'okokhorela. Owo, nipuro nlo olelo, Owo omphavela o, okhala ntoko, omulopola mutthu wira avare Masu.

⁵³ Vano wira nikhunle Masu oolempwa, nirowe muLiivuruni mwa Okhuma, wa nisomi na Exikola ya Ttiminku.

⁵⁴ Mookhalana muteko w'opatiiso? [Munna Neville oniira, "Nnari, mpakha ewoora ya neethanu na mosa makaaripi ila."—Mol.] Nnari. Muteko w'opatiiso ewoora ya neethanu na mosa oxekuw'ola.

⁵⁵ Nirowe kapiitulu 17 ya Okhuma, nipacerye e—eversiiikulu 5, kookupali, iversiiikulu 5 ni 6 sa kapiitulu 17 ya Okhuma.

Vano APWIYA yahimuhimeerya Moise wira, Murowe ohoolo w'atthu, ni mwaakuxe mahumu a wIsarayeli; ni ekopo anyu, yeeyo yaamanenle-anyu maasi a muro, mukuxe mmatatani mwanyu, muroweke.

Moone, miyo kinrowa okhala ohoolo wanyu . . . vasulu va mwala Horepe; ni . . . mwamanele vamwala, vaavo vanookhuma maasi, atthu anoookhalana yoowurya. Vano Moise aahiira siiso mahumu a Isarayeli amoonaka.

⁵⁶ Vano vaakhanle wira kaamwiihana ela yoosoma yaamukhaani ya Exikola ya Ttiminku, kaatthuna kikuxe ela ntoko mwaha wa nisomi na voosiis'ula, *Maasi Ankhala Voohimala Vamwala.*

⁵⁷ Hiyo noosuwela wira Isarayeli kweekwe onnikhalaka ethooneryo ya wahala ya ekereja. Okhala wira, Isarayeli yaari atthu a Muluku mpakha awo okhuma wEjitu, vano nto awo yaari ekereja ya Muluku okhala wira awo yaahivalaanihiwa ni olumwenku wothene.

⁵⁸ Nto okathi onivalaanihiwaahu ni olumwenku wothene, nto hiyo ninkhala ekereja. Masi vakhalaru wira ninkhala oovitikeleliwa n'ulumwenku mukina, vano hiyo khanikhanle

mukereja. Vano kinroromela wira eyo enookela voviixerya saana, ni ophwanya opuro aya. Moone, hiyo khanihiyo ekereja mpakha nivalaanihiwe ni olumwenku. Niivalaanihe, nikhume eriyari y'atthu ootakhala, nihikhale nnaata ni yaawo, ni nihiire mpantte wa itampi saya. Muhiitthukeleke ekheero ni alipa-oohaamini, masi mwiivalaanihe ni itthu sa molumwenkuni.

⁵⁹ Nto okathi Isarayeli aaryaawe wEjitu, awo yaari atthu a Muluku. Vano vaihaneliwaaya okhuma, wala vakhalanne-aya okhuma, ekhumaka, nto yaaihaniwa ekereja, okhala wira waari okathi yoowo awo yiivalaanihale-aya ni olumwenku mukina.

⁶⁰ Nto nuulumo nene *ekereja* nnihimya “oowiihaneliwa okhuma.” *Okhuma*, “okhuma.” Khula mmosa a hiyo, ntoko aKristu, nootoko okhalana okhuma mmakhaleloni mwahu. Naahikhalana okathi waaihaneliwaahu okhuma eriyari ya axirikha ahu, wiihaneliwa okhuma eriyari ya atthu nitonko ahu opatthana ni yaawo, khukhala atthu oovirikana, wira neetteke n'atthu oovirikana yiira enamuna yoovirikana ni yaalavula enamuna yoovirikana. Iwo waari okhuma mwa makhalelo ahu.

⁶¹ Ethoonyeryo yooreera saana Isarayeli onivahalyaawe, ya okathi Muluku aawiihanne-awe wira ekhume. Awo yaahikhalana okhuma, ni yaakhumme eriyari y'a—y'atthu a molumwenkuni, ni khukhala nloko novalaanihiwa, wa Muluku, atthu oomeekha. Awo yeettasa vathi va muuttutthi wa mukhuneelo. Awo yaakhala ni yeetta ni Nripu na Mooro nuulupale. Nto Muluku aahaakumiha wEjitu, erowaka muttetthe Owo aalaiheryaawe.

⁶² Nto, mwa okhuma nno, awo yaavahiwe muhooleli a muroohoni, muhooleli, yoowo aari Moise, profeta muulupale ootikiitheliwa aari mu—mutthu muulupale. Owo aari mutthu ooreera murima, owo aayariwe mutthu ooreera murima. Muluku aahimwiihana okhuma mw'ame awe, hata okathi uwo ohinatthi; Muluku aahimutthokiherya ohinatthi opattuxiwa olumwenku, okhala muhooleli a nloko nle, wira aaruuhele okhuma nno atthu.

⁶³ Va okathi vakhani ovinre, miyo kaahilavula n'axinamwane va mutapernakulu, ni kaahikhalana mutthaka mwaamukhaani w'awo; ni khuhimya, ahiiso khuvaha eyooniheryo yaamukhaani ya moota Yokepeti, moota owo aalompale-awe, owo ni Amerami, tiithi awe Moise, mwaha wo wira etthu yo waavuluxa atthu. Nto Amerami aahoona yoowona ya Muluku eemenle-ene, ahiiso Nlaikha, nithoonyaka onikela epheyo, nto khumuhimeerya etthu yaarowa wiiraneya. Vano Moise mwaamukhaani khuyariwa. Ni awo khayooovanse sooruma sa mwene, nnakhala woopopihiwa. Awo yaanisuwela wira Muluku aarina ntata Nawe mwa Moise, nto eyo yaahimaliha mwaha. Eyo ekeekhaii. Voohicala etthu mwene aahimyaawe, etthu olumwenku wa poliitika waahimyaaya, etthu p'itthu ekina yaahimyaaya, awo yaanisuwela wira Muluku aarina ntata Nawe mwa Moise. Tivo

awo khiyoovanse omuhiya, vaavale eriyari ya ikonya; okathi iyo saaryaaya sooneneva mwaha wa axaana aHeperi, yaawo yaavahiwe khukhuuriwa ikonya. Ni nnakhala vo Moise aaheliwe mme muhina mwa nivuku naamukhaani khusukhumeliwa eriyari ya ikonya, vale eriyari ya seiyo. Okhala wira, awo khayoovasa etthu, awo yaanisuwela wira Muluku aarina ntata Nawe mwa Moise.

⁶⁴ Ahe, vano, vaakhanle wira naaniwerya osuwela etthu emosaru yeeyo, wira Muhooleli ahu muulupale, Erooho Yoowaarya, Muluku ooveleeliherya Yeeyo, ni Owo ti Muhooleli ahu, ni hata wira olumwenku onihimya exeeni, ni moota zeeni awo anootheyaayani ni woonyemulani, hiyo nimmuthara Muhooleli ahu! Muluku oveleelin'he Erooho Yoowaarya wira okhale Muhooleli ahu. Munnona? "Woohala okathi vakhani olumwenku khunrowa-tho okoona. Nave nyuwo munookoona, maana Miyo kinookhala ni nyuwo, hata mwa nyuwo, mpakha omala olumwenku." Tivo, Muhoolelii ahu muulupale ori ni hiyo, Erooho Yoowaarya. Vano nihaana omuthara Muhooleli ola ni wira siiso ntoko Owo sinihimyaawe wira. Nto Muhooleli ula khonkhalakhala onikumihaka mphironi, Owo onoonikhaliha mphironi mwa Soolempwa okathi wothene. Masi Owo khonrowa hata epantte *emosa* mwaha wa etthu, ni epantte *ela* mwaha wa etthu. Owo onookhala voolikana-ene mphironi mwa Soolempwa.

⁶⁵ Ni Moise aahikhalana nlaka wira owo aarowa omukuxa Isarayeli, n'utthara nto mpakha epantte ekina ya Ephareya Yooxeerya, epantte ekina ya Yordani, mpakha olukama muttethe wa natiri, eviraka mothakoni. Khaari Moise aakhumme mphironi. Khaari Muluku aakhumme mphironi. Yaari atthu yaakhumme mphironi, yaatannyale mulattu ene. Tivo, nrowe nuupuwele itthu iya vano. (Kileveleliwe.)

⁶⁶ Moise, ntoko muhooleli oottikittheliwa. Vookiserya, okathi owo aawoonihenrye-awe atthu, ni ithoonyeryo ni sootikiniha, Muluku paahi aaweryaawe wira, owo aahipaka ithoonyeryo iya ni sootikiniha ohoolo w'ahumu a Isarayeli, ni ohoolo wa Isarayeli, mpakha awo okhala ookupali wira Moise ola aari ole oottikittheliwa aarowa waakumiha elapo ela, mpakha muttethe ole wooreera awo yaalaiheriwaaya. Vano okathi awo yoonalyaaya itthu iya suulupale Moise airalyaawe mwa nsina na Muluku, awo yaanitthuna omuthara. Vano owo khwaakumiha, khwaaviriha Ephareya Yooxeerya, khulapuwa, mutthayani moowuuma, khukela mmukwahani wa mothakoni, yeeyo enihimya okathi wo wehereriwa.

⁶⁷ Okathi mutthu onimwaakhelaawe Kristu ntoko Moopoli awe, itthu sothene sinkhala sooreera. Masi, mutthu ula ohinatthi okela moopatiisuni wa Erooho Yoowaarya, mutth'ula, owo ohaana toko okhalana enamuna y'oreerihiwa. Owo ohaana okhalana okathi wo wehereriwa mmakhaleloni mwawe.

Nyuwo othene mwaahikhalana. Owo aahikhalana okathi awe wo wehereriwa. “Khula mwaana onrwa wa Muluku, onoowaxuliwa toko, ottharuxiwa, ohukhummwa. Ni hiyo naahiweyeke ovilela nttharuxo, nto eyo enooniherya wira khanihiyo aana a Muluku; hiyo n’ana oophwanyiwa, nave kahi aana a Muluku,” Bibilia oohimya. Masi hiyo naweryaru ovilela nttharuxo, nisuwelaka wira “itthu sothene sineettiheriwa wa mureerelo w’ale animphenta Muluku,” vano hiyo n’ana axilopwana n’axithiyana a Muluku, vano Owo onninitthitta ni Erooho Yoowaarya mpakha nihiku no woopoliwa wahu. Moone, eyo ti ehukhumu, ekokhelo, etthu muniviraahu-mo.

Nto Isarayeli, ntoko ethoonyeryo ya ehantisi, aahaana ovilela ehukhumu ila.

⁶⁸ Vano, okathi yaaryaaya wEjitu, vano Muluku aahinveleeliha Moise. Vano owo aahookola ekopo, vano itohomwa ni itthupo khukhumela mutthayani. Owo aahokolela onsuwani, vano nlo khutupweela. Owo aahokolela vamaasini, vano awo khuthatuwa ephome. Vano, Isarayeli aari oKanani. . . o—oGoxeni, ovirihaka okathi wooreera paahi; nsuwa khinaatupwenle, ihasara khisaaphwannye; vano, awo yaahiviriha okathi woovuwa paahi!

⁶⁹ Ntoko nyuwo murikimooopowa-ru. Sothene, axipalame yaaipa voovirikana, ni sothene saari soosiva. Nto, oh, wulu, moota itthu sothene saaryaaya sooreerexa murikimooopowa-ru! Vano khurwa okathi wo wehereriwa, ottharuxiwa, okathi wo oreerihiwa, wiireeriha mmansinyu mwa itthu sa molumenkuni, “muhiyaka miritti sinoorukureryani vookhweya-vo.” Nyuwo, mulopwana, mwaahaana ohiya onvura sikaro, ohiya owurya wanyu, ohiya orowa musaala wa pilyaari, meera anyu a iturufu ohiyu wothene. Itthu iyo sothene, nyuwo mwaahaana wiireeriha okhuma mwa seiyo, mwaha wo waamini Ephome ya Yesu Kristu. Wiireeriha! Nyuwo athiyana mwaahaana ohiya maihi anyu wunnuwa, orakamiha soowara sanyu, ni wira voovirikana saaryaanyu. Okathi wooreerihiwa! Imaara sinci-ene awo annirukunuwa khutthika; ahe, owo kahi mwaana a Muluku, moone. Mwana a Muluku oniweha oKalvario, ni onnisuwela wira eyo ti ya mureerelo awe.

⁷⁰ Vano nto moovirani mwa okathi mwemmo, ti vaavo omora wuulupale waarwiiyaaya, wIsarayeli. Vaphiyalyaaya okathi ula muulupale wa mittitthi, atthu khupacerya omorela, okhuma epante emosa mpakha ekina. Vano moowaapani mwaya, “Ahe, naanitthuna nitthikenle wEjitu. Minepa sahu soophweeleya ni mukatthe ola wooveya.” Mwa moolumo makina, vaakhanle wira kaakuxa ntoko ehantisi vano, ti yeeyo awo yaahimmyaaya.

⁷¹ Vano mwa nihiku na vano, yaamukhala, “Oh, khula Namararu ohiyu, muthukumano wa mavekelo! Khula Ettiminku voosiisu, otthikela okereja! Exeeni eniwaahu? Etthu emosaru; mulaleyi onoovenya n’ulaleya; masipo; n’utthika.” Moone, vano

nyuwo munoorowa paahi okhala wira muhaana orowa. Nyuwo khamuhiyo mulipa-ookokhorela. Mulipa-ookokhorela onrowa iwe wira akokhorele, wira alavule ohoolo wa Muluku awe, wira amuttotopele Muluku mwaha w'oreera Wawe murima; mwa Masu othene, owo onnivarelela Yaawo.

⁷² Ntoko mwaha wo ophentana. Vaakhanle wira mweetta ni mwali okhala wira mwaasuwela wira mwaahaana wira, wala nyuwo mweettana mmiravo, okathi waaryaanyu mwali. "Amaama antthuna wira miyo keetteke ni mmiravo ola, masi nkinwerya onvilela." Wa nyuwo khenihimya etthu owo orwa owoonani. Wala, vakhala wira ti enamuna emosaru wa mwali wa mmiravo, wala mmiravo wa mwali. Nyuwo munookhuma ni yoowo, owo onimoonyoonyihani; amaama antthuna wira mweettaneke yoowo okhala wira owo ti enamuna ya mwali amaama onaasivela. Moone, ennoonyoonyihani; kuuvo ophentana. Masi nyuwo khamuncala, nyuwo khamuntthuna wiilokiherya, khamuntthuna orowa omoona. Nto eyo e... Vano, etthu yoonanara. Nto owo aarwaaka owoonani, wulu, munthuna paahi wira owo aakuve, orowe owaani.

⁷³ Eyo ti enamuna emosaru eryaaya okathi nyuwo, "Xeeni awo olaleeryaka okathi munci-ene? Ankhi itthu *iya* sothene, ni itthu sothene?" Moone, khamusiveliwe.

⁷⁴ Masi okathi vekeekhai munkhalaanyu oovarelela Masu othene, ntoko Erooho yooloponle-ayani voosiis'ula, moone, "Oovarelela Masu othene." Eyo pooti okhala etthu Owo onlavulaawe ni nyuwo. Nvarelele! Eyo Ekumi Ehinimala, khula Masu a Muluku. Onkhala ohakalala orowa okereja, mwa khula enamuna. Hata wira onooviha, oriirya, oohicaliwa, hata wira atthu anoonyakulihana, anooretteha, etthu p'itthu aniiraaya, nlelo ohakalala wiiwa Masu a Apwiya. Vano nyuwo muri moophentani nto ni Kristu, moone, nyuwo onnoosivelani orowa okereja.

⁷⁵ "Ahe, oophentiwa, Ettiminku voosiisu emaara ekina, Kinoona wira nihaana waarapiha anamwane nirowe iwe. Wulu, ti yoonyoonyiha!" Moone, khamusiveliwe.

⁷⁶ Masi nyuwo vekeekahi mwakhalaru oosiveliwa, khimunwerya olipelela mpakha ophiya Ttiminku voosiisu, nyuwo muhaana paahi ophiya iwe ni yaawo. Nto niyo ninoophiya, ni okhuma... Atthu a Muluku, awo khamoonyoonyihani. Vano, awo—awo axinna alopwana n'athiyana. Ntoko saahimyaaka, "Munkhala ootikana ntoko melaasu a Meele voosiisu wooriirya." Awo—awo khamikhoowa, ankhala vamosa paahi, moosuwela, anoopharaana. Vano, nlo nuulumo noolipa, masi ti—o—ophavela wira musuwele etthu enihimyaaka, moone. Nyuwo munkhala vamosa. Nto vantepaaya oriirya, anootepa opharaana. Nto ti siiso yaatthuneyaaya okhala ni hiyo. Oriirya. . .

Okathi apatthani a elapo ya vathi
 anoohiyaayani,
 Mmwaattamelaxe Yoowo!

⁷⁷ Ni etthu hiyo nimphentanaahu, mmosa ni mukhwaawe, kahiyo okhala wira nirookhala pani; masi ti Kristu mwa khula mmosa, hiyo nnimphentaahu, moone. Ti Muluku ori mookhala wahu, hiyo onimphentaahu. Vano onninisivela othukumana. Naaniipaka nsipo na khalayi:

Noottottopeliwa nikhale nlutte ninthuka
 Mirima sahu moophentani w'oKristu;
 Opatthana wa muupuwelo mmosa
 Onkhala ntoko ole Osulu. (Munnona?)

Opatthana wa muupuwelo mmosa
 Onkhala ntoko ole Osulu.

Ohoolo wa Ehice y'Atithi ahu,
 Ninniroiha mavekelo ahu voowiilipiha;
 Woova wahu, miroromelo sahu, sootthuna sahu
 sinkhala imosaru,
 Ohakalala wahu ni ovela-vela wahu.

⁷⁸ Munnona? Ayo, mulopwana! Mmosa aakhela eparakha, hiyo othene ninnitteeleliwa murima mwaha wa yeeyo. Mmosa ariipiwa murima, hiyo ninooriipiwa murima ni yoowo. Hiyo—hiyo ninthuna othene nikhale oowiiraana. Vano ti siiso entthuneya wira hiyo nikhaleke.

⁷⁹ Nto ti siiso Isarayeli vaatthuneyaawe okhala. Masi khukhala muritti, "Oh, mukatthe ola wooveya wa kweekwe!" Yolya ya Malaikha, "Ahe, xeeni okhalanaka mukatthe ola wooveya kweekwe? Minepa sahu soophweeleya ni etthu ila! Ni sothene ti soovonyeya. Ni—ni emana ela ya khalayi emmora khula ohiyu, vano, naamwamputi okhalana aayu ni aayu-poro a wEjitu." Moone, mirima saya khasaalikanne wira yeette mukwaha.

⁸⁰ Nto okathi mulopwana wala muthiyana onipaceryaawe wiisinliha orowa okereja, ankhalaaaya ookhulumuwa mwaha wo orowa okereja, awo khalikanne wira yeette mukwaha. Ti yeeyo. Yookhala etthu evonyeiyeyo nipuro nlo.

⁸¹ Oh, mwaamphentaka Muluku, ni muupuwelaka wira munoorowa Wirimu, ni wira nyuwo othene munrowa hoothe:

Opatthana xeeni, opuha xeeni wa oMuluku,
 Kimumulaka mmoononi wa ohimala;
 Oh, murettele xeeni wooreerihwiwa ni Apwiya
 aka vakhiviru,
 Kimumulaka mmoononi mw'Aya wa ohimala.

Exeeni . . . Ninniipa masipo awo.

Hiyo ninnikhaliheryana mooxankani mwahu
 vamosa,
 Miritti sahu vamosa;
 Ni imaara sinci-ene wa mukina ninnimora
 Niithori no okhupanyerya.

Naavalaanaka,
 Eyo enniniwereiha muhina;
 Masi hiyo ninimwiiraana mmurimani,
 Ni niwehereryaka okumana-tho okathi
 woottharelana wa mavekelo. (Ayo,
 mulopwana, nlelo oowiiraana mmurimani!)

⁸² Vano nyuwo muniilikanyiherya mukwaha, moone, moolikana wira murowe Muttetthe wa natiri. Okathi wo wehereriwa, nlo nipuro noowopiha; mothakoni, okathi wo wehereriwa.

⁸³ Isarayeli, okathi awe wo wehereriwa, aahipacerya waakhulana ni onyakulihana yaaworu, ni waahaananara mukatthe. Nto awo yaatthuna otthikela wEjitu.

⁸⁴ Vano nto awo khupacerya wiisinliha mwaha wa muhooleli aya. Oh, awo yaanoova wira owo aamwaathweeleliha; vaamanly'awe wiisooniha wira aari muhooleli, ni Muluku aahooniherya wira owo aari muhooleli. "Ahe, khino hiyo ninniraka ntoko onamathipelela vakhani. Ni—ni khino nimpaceryaka, ni nnawu noovonyeya," wala, etthu siiso, moone, awo yaalavula envirikanyaka Muluku ni onvirikanya Moise, Muluku ni muhooleli Awe.

⁸⁵ Vano naphiyerya nipuro, ninihimyaahu wira, "Nkisuwenle sinto Masu anihimya *Yeela*, wala nnari," ni, "Miyo nkinsuwela sa Erooho Yoowaarya; miyo ka namahoverya vakhani Yeeyo. Miyo kinnaasuwela akina ahinsuwela." Ahe, murowe wEjitu. Munnona?

⁸⁶ Masi vakhalaru wira vekeekhai moolakela wira mutthare ephiro, mukhale oratta-ene ni Muhooleli ola, Erooho Yoowaarya, mukhale ni Masu. Nto nyuwo mwakhala ni Erooho, Eyo enimookhalihani Mmasuni. Ti yeeyo. Eyo enimooroihani muttharaka ephiro, ephiro ya Masu. Ni muhoove Eyo. Khenrowa ohonona hat'etthu, Eyo enimookhaliheryani paahi vakhala-ru wira murimwiiniwa murima. Enoovoniha mixankiho sothene, Erooho Yoowaarya enimwiira.

⁸⁷ Vano hiyo ninnoona wira, mphironi mu, vaamanlyaaya okhala siisa, awo yaahiphiya nipuro na Horepe. Ni H-o-r-e-p-e, Horepe, vano ninnoona wira . . . rowe nihimyakase nsina nlo. Ti vaavo n—nsina *Horepe* nnihimya "nipuro noowuuma" wala "othako."

⁸⁸ Nto hiyo nakhumaru moopatthanani wa mmosa ni mukhwaawe mukereja, ni moopatthanani ni Erooho Yoowaarya, eyo enniruuha nipuro noowuuma, othako, hat'etthu ekumi,

sothene sinkhalana miiwa. Moone, o—othako, nipattuuxa naamukhaani na ekosa ni mwiiwa owo mwa yeeyo. Nyuwo mwaanisuwela exeeni iyo? Nlo nikukhu naamukhaani noowoolowaseya nahaarina maasi, nirimwiikhuna saana mpakha okhala mwiiwa. Ni mwaamoonaka mutthu siiso, khino munepa wooreeraxa waatthuneya wira okhuwariwe oratta-ene, aamukhala nikukhu naamukhaani noowoolowaseya wala etthu siiso. Masi ohiya vo, nirimwiikhuna mpakha okhala mwiiwa, ohomaka sothene, moosuwela, ophwanyaka nthowa. Etthu emosa paahi entthunaaya maasi paahi. Ti yeeyo tu. Nlo paahi ninthuna mu—muhakalaliho, wala epwaxakaseryo, eriirihelo ya Apwiya. Ni—nininwiitaphula mmansaya, mwahelaru vamaasini paahi.

⁸⁹ Masi, ti vaavo ale ankhala nipuro nenlo ahaana ohaawa ni mikhalelo sa nipuro nlo. Nto ale anthuna okhala mwa enamuna yeeyo ya mukhalelo, wa vaavo itthu sothene sinihomaaya ni onyakulihana paahi, ni waakhulana ni oviruwasa siiso, ahe, munookhala mwa mukhalelo yoowo, ti yeeyo tu. Masi khanirina okhala weiwe, khivantthuneya hiyo okhala vaavo.

⁹⁰ Vano, Horepe ola naari nipuro Muluku oceiyaawe ni atthu, okhala wira awo yaaroophiya nipuro nla khukela mwa mukhalelo yoola. Vano Owo aahaaruuha otthikela weiwe, okhala wira awo khayaatthunne wetta mphironi. Awo yaarookhuma e—ephiro yootthuneya, kuhapuwela epantte ela nno ya ephiro. Vano nto eyo yaahimwiiriha Muluku wira etthu yaari yoowoopiha. Owo . . . Yaahimwiiriha Muluku omukuxiha Moise ekopo ya olamula owo aalamulanne-awe nloko, ni khumana Mwala, wira oruuhe maasi.

⁹¹ Vano, yookhala yooxutta yooreera va vaakhanle wira naaniwerya paahi ovara yeeyo, moone. Ni okhala wira hiyo khanireere okhuma mwa yoolikana, khubaraxaxa olumwenku, ni itthu, yoomwiiriha Muluku okuxa ihukhumu sa olumwenku khimuhukhumu Mwan'Awe ni yeeyo, oKalvario, wira hiyo nitaphuwe. Nyuwo munnoona etthu enihimyaaka?

⁹² Vano, wira aaroihe atthu ala vamaasini, vaamanlyaaya ophiya iwe, nipuro nla noowuuma naahipakiwa Kalvario. Nto vale Muluku khimuhimeerya Moise, Owo khwira, "Mmukuxe ttootto ni mahumu, murowe, vano Miyo kinookhala Vamwala ohoolo wanyu." Nto Mwala ola aari Kristu. Ni Moise, ni ttootto amuruhanne awe olamuliwa elapo ya Isarayeli, aamukunxe ttootto yoowo khumana ihukhumu sa Muluku Vamwala. Munnona? Owo aakunxe itampi s'atthu khuhela vattoottoni vaava. Yeeyo, owo aarinaawe wira aamane atthu. Ohiya waamana atthu, owo aamane Mwala. Nto Mwala, ni muteko wa Muluku, waahiruuha woopowa, waahaaruuhela maasi atthu yaapweteya. Eyo yaahaaruuhela ekumi atthu yaakhwa. Nto ti yeeyo Muluku iralyaawe mwaha wo okuxa Yawawe—ekopo Awe ya ttootto a ehukhumu, ni ovilikela itampi

saka ni itampi sanyu vattoottoni vaava; okathi waarinaaya wira onimanne hiyo, masi ommanne Kristu; wira mwa Yoowo ekhume *maasi*, yeeyo enihimya “Erooho,” Erooho Yoowaarya ekhumme mwa Yoowo, wira enivahe Ekumi. Vano hiyo nookhalana Ekumi Ehinimala. Vano, Mwala ole aari Kristu. Vano hiyo nintthuna niwehe.

⁹³ Kihoona ikwerethelo sinci-ene sootthokeleliwa sa Mwala ola. Kaahimoonna mmosa w’ale oowuulumelaxa, woohikhala khalayi, mpakha vaavo waari mwa—mwala mwaamukhaani waari vasulu va ntumuxa. Ni—ni Moise aaira omanne mwala ola, ni Isarayeli aari vathi vale ni ekoopfo ya exa, owuryaka ottonya waamora vamwala va. Vano owo muupuwelo wa mutthu paahi.

⁹⁴ Masi okathi Mwala ola okumihenryaaya maasi Aya, yaahikhala atthu ovikana imilyawu piili, ohiya imompe, ikhamelo, ni sothene sikina saawunrye mmicomani mwa maasi a Vaavo. Waari muro woowaatta waakhumme vale!

⁹⁵ Eyo p’inamuna awo aneereryaaya omukhaliha Kristu, Erooho Yoowaarya olelo. “Otathela vakhani paahi.” Moone, voophiyerya paahi wira ewaaminiheni wira ookhala Muluku. Nnari.

⁹⁶ Eyaattelo ya Maasi! David ohimye wira, “Ekahi aka ennisaryaxa!” Eyo ekhoowelo ya Erooho Yoowaarya paahi.

⁹⁷ Atthu animoova Eyo. Atthu akina aniira, “Ahe, miyo kinnoova vakhani wira *ela* wala *ele*, wala vairaneya wira kinookela mowiixerya vakhani. Kinoowerya owoonihani mutthu aatempe vakhani.” Masi khimummuthoonya ole aahaakenle ottaiwene vakhani. Munnona? Ayo, anghi ale yahaakenle ottaiwene voophiyerya?

⁹⁸ Vano, aannikhalaka atthu kamosa-kamosa yaakenle mw’erutthuni, ni yaapacenrye ni nnawu noovonyeya. Ni—ni kahi Muluku, masi atthu a...Mwaha wo oheettiheriwa oratta-ene, ni siiso, ahiirihawa opacerya ni nnawu noovonyeya, vano arookela moothipelelani. Vano nto olumwenku wothene, xetwani onaathoonya yaawo, “Munnoonna yeeyo! Munnoonna yeeyo!”

⁹⁹ Ahe, mukihye keemele voosiis’ula koothonyeryeni ala imilyawu miloko sene anci-ene ahinatoko hata opacerya. Anghi yaawo? Moone, nkawehani mukhalelo aya. Nkanweheni mmiravo ntoko Eichmann olelo, ni ya osuluxa...Awo aniira, “aPentekosite t’ohilakeya ni oohifayi, ni kahi oosoma,” ni sothene siiso. Nkanweheni Eichmann, mmosa w’axilopwana aalupale oosomaxa mulaponi. Vano owo oowiiva, aana imilyawu thanu na mosa n’athiyana ni alopwana, minepa imilyawu thanu na mosa. Nyuwo khamuntthuna omuthoonya mutthu siiso.

¹⁰⁰ Masi mwaamukhaani mmosa waamurikela, osoma, khino aaromonle nsina na mBibiliani voovonyeya, nto, wala khino aahimye wala aairale ethu yoovonyeya, wala oirale ethu

yoohilikana, ipaphelo sa ihapari sintthuna olepa mapuro othene, ni wira, “Kahi oolipaneyya.”

¹⁰¹ Vano vakhala wira eyo khekhanle olipaniwaka, ankhii osoma, itthu ni akhili awo arinaaya olelo? Nkanweheni Adolfo Hitler. Nkaaweheeni anoootoporo a molumwenkuni olelo. Nkaaweheeni. Nlikanyihyo na khalayi, “Muhusi wa nrattha na mmuro ti wa nrattha na mmuro.”

¹⁰² Etthu murinaanyu wira enweryaneyya, ni Erooho Yoowaarya, wira mulamule ele eri yooreera ni yootakhala, ni mukuxe ele eri yooreera ohiya yootakhala.

¹⁰³ Vano, ninniphwanya wira Kalvario ula awo yaarinaaya, ni maasi a ekumi yaahikhoowa wa atthu.

¹⁰⁴ Vano, atthu kamosa-kamosa aakhalana mmurimani mwaya ni muupuwelo, wira Isarayeli othene aahiwurya, ni wira nuumala yaahikuxa ikhamelo ni khutthuka ikhukulu mukhavaloni mwaya, ni siiso, khwaakuxa aana aya khurowa nipuro nikina, ni khuhiya Mwala vaavale, oyeeheyaka. Ti yoovonyeya.

¹⁰⁵ Mwala owo waahaatthara, ni maasi ale yaahaatthara. Vano mwa aKorinto Oopacerya, kapiitulu 10, kookupali, ni eversiikulu 11, munoowerya ophwanya, wira “Mwala owo waahimutthara Isarayeli.” Vatthu ti vatthu awo yaarowaaya okhuma nihiku nenle mpakha ohoolo, Mwala waarowa ni yaawo, ni maasi yaanaatthara.

¹⁰⁶ Ethoonyeryo xeeni yooreera, ni n—nvarelelo wooreera ni nankura a mulipa—oowaamini olelo, onsuwela wira Mwala ole waatonko omaniwa, Maasi ale yaatonko okhuma oKalvario, anrowa ni hiyo khula nipuro niryaaahu! Oh, wulu! Kahi otthikela nipuro nimosa, ni wira, “Ahe, hiyo naahikhalana Maasi nsuri, iwe.” Hiyo nookhalana Maasi olelo, vaava va, okhala wira Mwala ole aari Kristu! Ni Kristu mmosaru nsana, olelo, ni mahiku othene.

¹⁰⁷ Moone, Mwala ole waanimutthara Isarayeli. Awo khayaatthara Mwala, masi Mwala waatthara awo. Amen. Isarayeli aahitthikela mukwaha awe. Awo yaarina etthu emosa paahi yo wira, eyo ti, otthikela mukwaha woowookowa, erowaka olukama muttethe wa natiri. Ni Mwala ni maasi yaanaatthara.

. . . *Mwala waatthara awo*: . . .

Akorinto Oopacerya anihimya siiso, kapiitulu 10. Vaareera.

. . . *Mwala ole aari Kristu*.

¹⁰⁸ Muluku aakunxe ihukhumu sa atthu khuhela mwa Kristu, khimuhukhumu. Mooweha wira, waahikhala muthari Vamwala, okhuma okathi yoowo? Mwala waahikhalana muthari, vaavo Moise aamanne awe. Ni Kristu aahikhalana nikuma, okathi Owo omaniwe awe, “Owo ohaaxeriwe sootheka sahu, ni makhwatta

Awe t'anivoninhe." Okhuma Ekumi yeeyo yaahikhuma Maasi a Ekumi hiyo nimpuhaahu olelo!

¹⁰⁹ Vano, wira mphwanye Ekumi ila, muupuwele, Ekumi ya Kristu enkhala ni Ekereja. Aleluya! Oh, vaakhanle wira naaniwerya ohela miyuupuwelo sahu vaavo mwa minuutu muloko sinttharelana! Kristu khonihiya Ekereja. "Miyo kinookhala ni nyuwo mahiku othene, mpakha omala olumwenku." T'atthu animuhiya Kristu, kahi Kristu onaahiya atthu. Atthu anihiya Eyo, mwaha wo ohaamini waya. Awo t'animuhiya Kristu, kahi Kristu onaahiya atthu.

¹¹⁰ Isarayeli aahihiya muro, kahi muro waamuhin'ye Isarayeli. Munnona? Maana, Bibilia voowooneya onnihimya wira, "Mwala ni maasi saahimutthara Isarayeli." Saahaatthara! Khula nipuro awo yaarowaaya, Owo waanirowa, nave.

¹¹¹ Oh, kaanitthuna, voosiis'ula, naakhalanne okathi, wira nikhunle ekapiitulu 1 ya Yoxuwa, vaavo Owo ohimmyaawe wira, "Mapuro othene inawu sanyu sinrowaaya onyakela, Miyo kihoovahani. Khula nipuro onrowaanyu, Apwiya Muluku anyu ari ni nyuwo. Muhimoove hata mutthu. Mukhale oolipa murima! Khula nipuro muninyakelaanyu, Miyo kinookhala vaavo ni nyuwo, hata wira ti vayi." Muluku aarowa ni Yoxuwa!

¹¹² Muluku mmosaru yoowo onnirowa ni Ekereja Awe voosiisu ula. Nrowe niwurye v'Ephattuveloni yeela iwe. Khula nipuro munnyakelaanyu, ti vaavo Muluku onrowaawe okhala ni nyuwo, wira ookhuwarini ni oovaheni Ekumi. "Miyo kinookhala ni nyuwo mahiku othene, mpakha omala okathi." Kristu mmosaru nsana, olelo, ni mahiku othene. Ikano sa Muluku.

¹¹³ Vano nyuwo muniira, "Vano, Munna Branham, xeeni hiyo ohiiraka itthu nto sintthuneya hiyo wira? Xeeni soovaha sahu ni itthu mukereja ohiphiyeryaka ottokottha, vaavo vaatthuneyaaya okhala? Xeeni ekereja ahu ohiwelaka mpakha nipuro yaatthuneyaaya okhala?" Atthu, okathi wo wehereriwa, anoekhuma ntoko Isarayeli siiralyaawe. Awo anuupuwela wira Muluku orimwaahiya.

¹¹⁴ Masi, muupuwele, Mwala khonatoko omuhiya Isarayeli. Isarayeli aahihiya Mwala, yaahiliyala wira Mwala waari ni yaawo okathi wothene. Owo waari vaavale vale, waarowa ni yaawo mpakha wookiseryani w'ephiro. "Owo waahaatthara." Owo khiwaakhanle woorakama-wo voohilavula. Khiwaakhanle woorakama-wo voohiiweya. Wala, khuwaakhanle woorakama-wo voohooneya.

¹¹⁵ Ni hata Kristu khokhanle! Ni Ekereja olelo, Owo khokhanle ota woorakama-wo voolavula. Amosa-amosa a nyuwo munootthikela ottuli, ni, muhiira yoovonyeya, ni ohoopweteyani ohakalala iwo, ni Maasi anyu ahuuma. Owo nlelo ori vanlakani voolavula ni nyuwo. Owo onnootharani. Owo onnisuwela

khula mweettelo mumpakaanyu. Owo onniwehererya owiiwani mmwiihanaka wira Owo orwe.

¹¹⁶ Nto mweettelo ola muulupale wa Pentekosite olelo, Muluku onoolipelela nyuwo omwiihana Owo vanlakani. Nyuwo khimukhanle woorakama-wo wira mulavule ni Yoowo. Ninaamwi niirale-ene voovonyeya, ni wira etampi, ni khimurerya ettuli Yoowo, ni—ni khwiira itthu sahaatthuneya hiyo wira, masi nnakhala vo Owo ori ni hiyo. Kristu ohimmye wira Owo aamukhala ni hiyo.

¹¹⁷ Bibilia ohimmye wira, “Maasi yaanaatthara aana a Isarayeli.” Okathi awo yaavoliwaaya ntthona, yaanisuwela wira maasi yaari vakhiviru.

¹¹⁸ Vano, itthu iya sineettiheriwa ni malamulo. Mweettiheryo wothene wa Muluku onlipiheriwa ni malamulo. Vano ninrowa okuxa. . . Nrowe neemele minuutu mmosa.

¹¹⁹ Nrowe nikuxe olumwenku. Owo onnivilikeya, khula iwoora miloko miili ni xexe owo onnipaka erukunuwelo yoomalela, oratteenexa, mpakha. . . Hiyo khinnaweryeke, ni siyensiya ahu othene, opaka eroroco enivaha ewoora yoolikana. Imaara kamosa-kamosa, iroroco soolikanexa awo ampakaaya, moovirani wa mwaakha mmosa, enimwaacerereya wala ovukuwa minuutu sinci-ene. Masi olumwenku khonavonyeke masi onnisuka khula esekuntu. Ti woolikana mpakha alipa a siyensiya olelo, anamasoma ittheneeri anweryaaya wooleelani wira, miyaakha miloko miili okhuma vano wala miloko mithanu okhuma vano, nsuwa ni mweeri sinookumana voolikana-ene mmosa ni mukhwaaya. Wamaliherya-ru orukurerya waya wa iwoora miloko miili ni xexe, ni orukunuwa okathi aya orukureryaka munela wa ehuhu aya, khonivonya hata tiki-taki emosa. Aleluya! Ti yoolikana, okhala wira oneetta vootthariha malamulo a Muluku.

¹²⁰ Awo annisuwela oratteene okathi mawimpi anrowaaya ovukuwa, minuutu ene, okhala wira awo annisuwela okathi xeeni mweeri onkhuruwaaya. Ni Muluku ookhalana sothene sookhalihwiwa oratteene ni nlamulo. Nto mweeri uwo waakhuruwaka, mawimpi ankhuruwa ni yoowo. Mweeri waawelaka, mawimpi anwela ni yoowo. Ni awo annisuwela oratteene, mwa okathi, okathi mweeri ule onrowaaya okhuruwa. Anniwerya ohela mukalentaariyuni mwa almanaaki mwa iyaakha ohoolo, ni wooleelani, mwa minuutu, okathi mawimpi ale anrowaaya opacerya okhuruwa. Vekeekhai, okhala wira ti siiso mweeri ontupweelaaya, okhala wira oheliwe vootthariha malamulo a Muluku.

¹²¹ Miyo kaaheemela, nihiku nlo, vakhiviru wa Ntthiya Michigan. Vano kaahirowa Ontthiyani Superior, kirowaka oCanada, eyaattelo ele yuulupale ya maasi. Nto kaaheemela vale, khuupuwela, “Imiilya kavi sikhhanle nxepa nla nuulupale

na maasi va?” Nto valapunwaaka Mich-. . . , ahiiso, Ntthiya Superior, kaahikela oMichigan, eyaattelo ya maasi yoo halela olikana. Nto iwe, okhuma Ntthiya Superior mpakha Ntthiya Michigan, okhuma Ntthiya Michigan mpakha Ntthiya Ontario, ni paahi. . . ni Huron, ni matthiya othene awo. Ipilyawu kavi vaara ipilyawu vaara ipilyawu, ni ipariri soohaalakeya sa maasi oosiva ari vantthiyana! vale!

¹²² Ni oNevada wu, ni wArizona, Novo Mexico, Onikhuma nsuwa wa oCalifornia, sookhala ikitaare imilyawu sene sa etthaya, yoowuuma ni yoohiruwerya. Ti yoowunttelana wira, maasi awo vaaweryaneya ophiya mutthayani mme elapo ela yaamulyiha olumwenku, ahikhanle hata athu ovoliviwa etala, ni okhalana yoowaattaxa yo orihela mpahari. Ti yeeyo! Ikitaare imilyawu sene saarowa oruwerya itonelaata imilyawu sa itonelaata sa patata ni rapoyu, ni afixawu ni—ni alufaase, ni rapaneete ni aipu, ni mixiri, ni sikina. Etthaya yaamuruwerya, en—enliplelela maasi paahi.

¹²³ Ni nno ari maasi osulu *nno*, ni nno eri etthaya ohitto *nno*. Vano ninniweyera woona, ni noosuwela wira yaamwiira, okhala wira ninoowerya olawiha maasi ni woona wira t’osiva, ni weethererya etthaya ni woona wira ti yooruwerya. Vano, sothene saakhanlyaaahu otthunaka, khasinkhalakhala sihelaka iyo vamosa. Masi, nookhala nlamulo, nto nlamulo nlo elemelelo. Vano, vaakhanle wira naamuvara muteko nittharihaka elemelelo, naamuwerya onaaniha etthaya ele yothene, nikuxaka maasi mmatthiyani ni onaaniha. Masi nihaana ovara muteko voolikana ni nlamulo na elemelelo. Khanikhanle ohela vale nitthunaka. Khanikhanle ohela vale ninyakulaka. Khanikhanle ohela vale nikhuwelelaka. Nihaana ovara muteko voolikana ni malamulo a elemelelo, wira niroihe vale. Muluku onihela sothene mwa malamulo.

¹²⁴ Va, kaamuupuwela, nkisuwenle sinto kootoko wooleelani yeela, wala nnari. Miyo kaari oKentucky, kixayaka ikhopa, ni Munna Wood, voophiyaka eyaakha evinre. Nto hiyo. . . Ikhopa saari soothowa, nto siiso hiyo khurowa owannyawe mulopwana mmosa, wira noone nkhamu naamuwerya oxaya. Mulopwana mmosa aahikhalana etthaya ikitaare soowaatta, ni etthaya ela iwe khiyaareere etakhwa. Masi Munna Wood khukileela, wira, “Mulopwan’owo khonaamini. Owo—owo mulipa—oohaamini.” Vano owo khwira wira owo aahimusuwela, tivo owo. . . ahiiso atithi awe yaanimusuwela, owo aamurowa akohe sinto aamunitthuniherya orowa oxaya.

¹²⁵ Hiyo khweettiha ekaaro mpakha owannyawe mulopwan’owo. Nto owo ni mulopwana mukina, oowaili aya oovikana miyaakha miloko mithanu na miili, awo yaakilaathanse mukhitte mwa mwiri wa masa. Nto Mwenye Wood aahirowa mpakha wa mulopwan’ola, nto owo khumwiirela, “Kaamuwerya oxaya vakhani nipuro nanyu?”

Nto owo khwira, “Ahe,” owo khwira, “vaareera.” Owo khwira, “Mwa Wood xeeni nyuwo? Nyuwo mwa mwaana a Jim Wood?”

Owo khwira, “Ti miyo.”

¹²⁶ Owo khwira, “Ahe, Jim mutokweene aari naxariya, ni siiso.” Owo khwira, “Nyuwo pooti oxaya khula nipuro muntthun’anyu, nipuro naka. Kookhalana ikitaare imiya *sinciene* nno mwiithanlele. Mukhuruweleke mukhatoni mmo, khula nipuro onthhunaanyu. Mukhale ntoko owannyinyu.”

¹²⁷ Miyo khukilaathi mukaaroni, okhala wira kuupuwela wira mulaleyi ni oohaamini khiyaarowa wiiwananasa, vakhala wira naarowa onvekela exonte mulipa-oohaamini.

¹²⁸ Vano nto nuuvira okathi vakhani, Munna Wood khwira, “Ahe, vano, vaamuweryaneya orowa ni pastore aka? Kinoona wira yaamukhala saana owo orwa okiveleela.”

¹²⁹ Vano mulopwan’ola mutokweene khurukunuwa ni ttootto awe, nto owo khwira, “Wood, nyuwo muntthuna okileela wira murookhalaxa vathi, mpakha murinaanyu okhalanaka mulaleyi ni nyuwo khula nipuro onrowaanyu?”

¹³⁰ Nto siiso, miyo khuupuwela, nuumala yeeyo, vanreerela kikhume mukaaroni. Vano miyo kikhuma mukaaroni, khulavula ni mulopwana mutokweene minuutu vakhani. Nto owo khukisuweliha naanaanoru wira alaleyi khiyaarina hata maana, okhala wira owo uupuwela wira awo yaahimya etthu awo yahaasuwelaaya hat’etthu.

¹³¹ Owo khwira, “Awo anoonyakula paahi mwaha wa etthu awo ahinsuwelaaya hat’etthu ya yeeyo. Ahe,” owo khwira, “mutthu aalavulaka ni miyo, miyo kinthuna owo asuweleke etthu enihimyaawe.” Vano, owo moonelo wooreera. Owo moonelo wooreera. Owo khwira, “Vano, vakhala wira mutthu onlavula ni miyo, nkinthuna wira olavuleke *etthu*, waakanyerya etthu ohinsuwelaawe hat’etthu ya yeeyo. Miyo kinthuna owo alavuleke etthu owo onsuwelaawe etthu enihimyaawe.” Ahe, miyo kinnittitimiha eyo. Miyo kaahittitimiha eyo mwa mulopwan’ole mutokweene.

¹³² Nto siiso miyo khwira, “Ahe, vekeekhai, khula mutthu ookhalana muupuwelo awe mwaneene.”

¹³³ Nto owo khwira, “Aahikhala mulaleyi mmosa aarwiiye nno elapo ela, miyaakha vakhani sivinre, aarina muthukumano oActon.” Nto owo khwira, “Mulaleyi ula, ohiyu umosa, oryeene muletto mulaponi, aahimuhimeerya mu—muhano mmosa aakilaanthe vamuthukumanoni, ‘Nyuwo mookhalana nleeso mpoolosani mwanyu. Ni nyuwo mwa Muhano *Lexe ni lexe*. Ni mookhalana muhima anyu onwereiwa vantumuxani nno. Nsina nawe ti *Lexe ni lexe*. Owo onookhwa, ni kankuru mmirimani.’ Ni khwira, ‘Mukuxe nleeso nla mwampweherye muhima anyu,

ni mmuleele, “SIISO ANIHIMYA T’APWIYA, owo khonrowa okhwa, masi onookhala mukumi.””

¹³⁴ Owo khwira, “Muthiyan’ola aari mpatthani ahu.” Ni khwira, “Hiyo nimuroihela muthiyan’ola nleeso nla osulu iwe, ahiiso, mulopwan’ola, uh, mutthu. . .” Yoopacerya owo khwira, “Muthiyan’ola, amwaar’aka ni miyo naahikhala osulu weiwe voosiis’ule ni naahikuxa, naahimulipelela muthiyan’ola. Nto owo khaareere otepa! Mameetiku yaaroomuhiya oohiroromela, okathi munci-ene. Owo khaareere otepa mpakha waarinaahu omukuxa vamukhumini, onvenxa wira nimpwehe vapinikuni, ni omuhokoloxa. Omurukunxa vamukhumini, owo khaareere otepa.” Owo khwira, “Ohiyo umosa, iwe, waahikhuma onyakula ntoko wira aahikhala mutthu aakhwiye.”

¹³⁵ Owo aari Ben vale, ni nleeso nlo, aaroihale weiwe. Miyo kookupali wira mwaari nyuwo, kahi siiso, Ben? [Munna Ben Bryant oniira, “Amen. Amen.”—Mol.] Aari Munna Ben va, aakuxale nleeso nlo, okhala wira owo t’amuroihale muthiyan’owo iwe.

¹³⁶ Ni khwira, “Voosiisu aya, owo aakhuura mukatthe wa masa oowaarikiwa.” Ni khwira, “Owo kahi onvara muteko paahi mmansawe, masi onnivara muteko wa namwaattamanani. Owo aari mukumi saana!” Owo khwira, “Vano miyo kweekwe kinniikohaka. Kaaphiyenrye-ru omoona mulaleyi ule, owo aanisuwela etthu aahimyaawe,” khwira, “Miyo—miyo kaamutthuna olavula ni yoowo.”

¹³⁷ Munna Wood khukiweha, ni miyo khunweha. Neemenle-ene vale, oottakatta, ni ooviheriwa ni ooriipa, naahikhala mmaxaaxani mutakhwani, ni—ni ephome ya ikhopa enittonyenrye othene hiyo. Nto siiso miyo khwira, “Ahe,” miyo khwira, “ti. . .Nyuwo munihimya wira mwaamuwerya olavula ni mulopwana yoola nto owo aamooleelani moota siiralyaawe yeele?”

Owo khwira, “Ayo, mulopwana, ti yeeyo enihimyaaka.”

Miyo khwira, “Ahe, eyo e—eyo etthu yooreera.”

¹³⁸ Miyo kaakhuura nimosa wa masa awe. Yaahikhalana ixaketa saamukhaani sa ncano mwa yaawo, moosuwela, ephovo ya mwaakha, Akostu. Vano miyo kaarina masa ala makhaani, vano kaahikhuura. Nto miyo khwira, “Awo masa oosiva saana.” Miyo khwira, “Mwiri ule ori vale okhuma liini?”

¹³⁹ “Oh,” owo khwira, “Miyo kiphatteiyeye mwiri ule vale, miyaakha miloko miraru wala miloko mixexe khalayi, wala etthu ekina.”

¹⁴⁰ “Ayo, mulopwana.” Miyo khwira, “Kaatthuna paahi kookoheni etthu.” Miyo khwira, “Vanweryaneyaya sayi. . . Kinnoona wira masa ale amonre mwiri ule, vano mataakhuru aya anoomoramora, nto ela paahi eriyari ya Akostu.” Nto miyo

khwira, “Hiyo khanaarina hata okathi w’oriirya, khinaarina hata exeelo wala etthu p’itthu, nave nakhala vo mataakhuru anoomora mmwirini mme. Mwaha wa xeeni yeeyo?”

Owo khwira, “Ephwamwaasi eroohiya mwiri.”

“Oh,” miyo khwira, “eronwe vayi?”

Owo khwira, “Vathi mmitathaarini.”

Nto miyo khwira, “Vano okathi xeeni onrowaaya okhala vale?”

Owo khwira, “Mpakha ephovo.”

¹⁴¹ Nto miyo khwira, “Vano enoottika, ni enimooruuhelani mataakhuru masya wira eruuhe muuttutthi, masa masya wira mukhuure.”

Owo khwira, “Ti yeeyo. Vekeekhai voolikana.”

¹⁴² Miyo khwira, “Ahe, kintthuna kookoheni etthu emosa, mulopwana. Nyuwo munaahimya atthu ala ahinsuwela etthu anihimyaaya.” Miyo khwira, “Mwaamuwerya okileeliherya Osuwela xeeni oniiriha ephwamwaasi ile ohiya mwiri ule? Yaakhanle-ru iwe okathi w’eyiita, mwiri waamookhwa. Mwaamwiiva mwiri. Eropo y’ekumi eri mphwamwaasini mwemmwe.” Vano miyo khwira, “Yaamwiiva mwiri. Osuwela xeeni oniiriha ephwamwaasi ile ohiya mwiri ule, okela vathi mmitathaarini, khukhala mpakha okathi w’ephovo, vano nto enahokolowa-tho n’uruuha masa makina?” Miyo khwira, “Muhele maasi mmucomani mwiitthele vanipottoni, nto moone khama, Akostu, anookhuruwela vathi va nipotto ehokolowe okathi w’ephovo. Munnona?” Miyo khwira, “Nookhala nlamulo nimosa, nookhala nlamulo na ephattu. Wookhala Osuwela okhalinhe nlamulo nla. Kahi yeeyo paahi, masi Osuwela weiwo ohaana ovaraha muteko nlamulo nlo, ninroiha mmutathaarini mwa mwiri, ni ohokolowa.”

Owo khwira, “Nkinatoko wuupuwela yeeyo.”

¹⁴³ Miyo khwira, “Munniwerya. . . Mwawerya vale ophwanya Osuwela oniiriha ephwamwaasi ile okhuma murinttani mwa mwiri mmwe, mpakha vathi mmitathaarini n’uhokolowa, owo ti Osuwela omosaru waakihimenrye iwe ohiy’ule, ‘Rowakani, mwamuhelele nleeso nlo muthiyana.’”

Owo khwira, “Nto nyuwo mwa mulaleyi yoole?”

Miyo khwira, “Ayo, mulopwana, eyo ekeekhaii.”

¹⁴⁴ Mwaisana kaari weiwo (owo ohookhwa), ni okathi naamukhweli ula aakilaanthe-awe mpirothi, operaka masa, a mwiri yoowo. Munna. . . Yoopacerya awo yaarowa onikumihana enoomolaka, awo khiyaasuwela hiyo naari aani. Vano miyo khuruwela khumuhimeerya yeeyo, wira hiyo naahitthuniheriwa ni yoowo. Ni khuhimya yeeyo, khwira, “Owo aahimumya Kristu voomalela ohinatthi okhwa.”

145 Moone, exeeni mwiri ule, Osuwela xeeni onroiha vathi? Nlo nlamulo. Nlo nlamulo Muluku okhalinhe awe. Nto nlamulo nlo ti nlamulo na Muluku ninrowa okhapelela mwah'owo. Amen.

146 Nyuwo moosuwela, miyo nkincala moota munkhuwelaanyu, ni wira—wira vano, “Khunrowa o, nsuwa khaninrowa waarya-tho elimwe ela.” Nlo nnimwaarya, khula enamuna. Nyuwo mwaairaka, “Miyo—miyo—miyo nkinrowa ohiya wiila.” Owo onimoorwa, khula enamuna. Okhala wira etthu ila hiyo onkhalaahu-mo, eniihaniwa olumwenku, eneettihiwa ni nlamulo na Muluku.

147 Vano, axinna alopwana n'athiyana, kintthuna kookoheni etthu emosa. Vano, vakhala wira nooyariwa vasya ni Erooho ya Muluku. . . Muluku khorina ipante sikhaani sooteetheya ni ipante suulupale sa ikuru, okhala Wawe wothene Mulukuu! Ni nyuwo mwaarina Muluku voophiyerya mwa nyuwo, hata wira waari muuttutthi paahi, iwo owerya woophiyerya okhaliha elapo esya. Iwo owerya oniphiiyerya opaka mweeri musya ni eyeettiheryo esya. Ti Muluku, ni ti ya ikuru! Ni naanaano va khula mulipa-oowaamini mu ookhalana Ekumi Ehinimala, yeeyo ekhanle, Erooho ya Muluku mwa nyuwo; Owerya oniphiiyerya waahihimuxa alipa-ookhwa, onrowa waavoniha aretta, onrowa ni okhaliha minela soolikana. Masi nyuwo, eyo eneettihiwa ni nlamulo, Erooho yeeyo eri mwa nyuwo. Nyuwo mw'ana alopwana n'athiyana a Muluku. Erooho emosaru yeeyo murinaanyu mwa nyuwo, enimoohihimuxani nihiku no ohihimuwa.

148 Yesu, okathi Owo aaryaawe muumu elapo ya vathi, okathi Owo okhwiyaaawe, munepa Awe waahikhuruwela mookhwaani, “Vano khulaleerya irooho saatthukweliwe, minepa s'atthu mukhatteya, yaahaarukunxale murima moovilelani wa mahiku a Nowe.” Erutthu awe yaahikela mmahiye. Masi Owo ohinatthi okhwa, Owo aahivahererya Erooho Awe mmatatani mwa Muluku. Erooho Awe yaaronwe wa Muluku, munep'awe waaronwe oshades, nto erutthu Awe khurwa mmahiye. Ni Yesu aahikhoottiheriwa ohihimuwa mpakha Soolempwa omaliheriwa. Owo khaakhanle otthikaka, okhala wira Owo aahaana okhala mmahiye mahiku mararu othana n'uhiyu. Masi okathi Soolempwa sothene simaliheriwaaya, ekhottiheryo ela yaahikumihwiwa; Erooho Awe yaahikhuruwela munepa Awe, munepa Awe erutthu Awe, vano Owo khuhihimuwa.

149 Nto okathi hiyo onikhwaahu, minepa sahu sinrowa vathi v'altaari a Muluku; weiwo kaareeriwaka woona, voosiisu vakhani ovinre, ntoko munsuwelaanyu, mwa yoowoona, vaavo Bibilia onihimyaawe, “Irooho sahu sinoorowa wa Muluku Yoowo onivanhe, nto irutthu sahu sinootthikela mutthayani v'elapo.” Masi nihiku nlo, okathi Soolempwa simmaliheriwaaya, irooho sahu sinoohiwa ni Muluku, sinookuxa munepa, nto munepa erutthu. Ni Owerya onrowa onihihimuxa, ori mwa hiyo

naanaano va! Hiyo naanaano va niri mapuro a Wirimu. Hiyo naanaano va niri Mooweryani wa ohihimuwa.

¹⁵⁰ Nahaakhanle nlamulo na yeeyo, aana a Muluku alopwana n'athiyana yaamukhaliha olumwenku nno ni yaamurowa okhala voomeekha mwemmo. Mookhalana Owerya mwa nyuwo wira mwiire. Mwakhalana eruku ya Owerya wa Muluku mwa nyuwo, mookhalana Owerya wo wira. Muluku t'owerya sothene. Munnoona enihimyaaka? Owerya ori mwa nyuwo onimwiira, mwaamuwerya olavula wira okhale olumwenku murowe mwakhale mwemmo. Aleluya! Eyo vo.

¹⁵¹ Iwo ti Owerya ori Mukereja vano, masi oneettihiwa ni nlamulo. Nto nlamulo nlo khanihiyo "othara nifunku na sooruma." Nlo nlamulo na waamini. Yesu ohimye wira, "Sothene sinniweryaneya w'ale anaamini." Nto nyuwo mwawerya waamini, sothene Muluku oneettiheryaawe munepa anyu wira mwaamini, eyo ti yawinyu. Khula nipuro maravulo a nnawu nanyu annyakelaaya, ni waamini, Muluku onnoovahani. Amen! Ti nawinyu, mookhalana, mwawerya vale ophwanya ehulelo ya nlamulo nla na waamini ninoohulelani yeeyo. Munnoona enihimyaaka? Owerya iwe oneettiheriwa ni... Nyuwo mwakhala mwaana mulopwana a Muluku, mwaana muthiyana a Muluku, eyo khenoohiyani. Eri ni nyuwo okathi wothene. Masi, waamini wanyu onookhuma wa Yeeyo, masi Eyo nlelo eri vaavo. Aleluya!

¹⁵² Okathi munoopowaanyu, Muluku onnoovahani waamini wira nvenye mwa soonanara sa mulaponi. Waamini wanyu onnixinta itthu sa molumwenkuni. Waamini wanyu exeenii? Waamini wanyu muteko owo Muluku ovanryaawe mwa nyuwo, wira ookhaliheni mwaana a Muluku. Munoohiya wootha wanyu, munoohiya wiiya wanyu, munoohiya owurya wanyu, okhala wira waamini wanyu onookhalihani vasulu va yeeyo. Amen. Mwaahireke, khamurina hata waamini. "Ni mwaha wo waamini muhoopoliwa, ni eyo mwa mahala."

¹⁵³ Eyaattelo ya waamini munikumiheryaanyu, ti Owerya mukhanlyaanyu okhalanaka, okhala wira mwa nyuwo onnikhala Owerya wo opattuxa Erimu ni vathi. Muluku onkhala mwa nyuwo, ni nyuwo mw'ana alopwana n'athiyana a Muluku. Amen! Eyo vo. Masi, iwo waamini wanyu. Yesu ohimye wira, "Ntoko sinaamini anyu, mwiireliwe siiso. Mwaaweryaka waamini, sothene sinniweryaneya. Vekeekhayi, kinooleelani wira, mwairela mwaak'ola, 'Othaame-vo,' ni muhioveryaka, masi mwaaminiki ele ehimyaanyu!"

¹⁵⁴ Vano enamuna xeeni y'atthu yaatthuneya hiyo okhala, nikhalanaka waamini mwa Kristu ola muulupale nvuluxa onkhala mwa hiyo, Mwala ola woomaniwa ohinrowa okhalakhala ohiyaka Ekereja? "Miyu kinookhala ni nyuwo mahiku othene, mpakha omala olumwenku," Okhala voohimala

wa ekhoowelo yuulupale yo woopowa ni Owerya omwareiye okhuma oKalvario okelaka Mukereja, Okhala voohimala wa Muluku mukumi, Mwala muulupale wookhwalala ni woomaniwa onnihoola mmukwahani mwahu.

¹⁵⁵ Isarayeli waahimpweteya waamini wawe. Awo yaarookhuma mphironi. Khupacerya wunlela makapu a enama. Awo yaahikhala ni waamini, ni yaaminiki wira Muluku aamurowa waaroiha mmuttettheni, khiyaarowa okhala hat'etthu wira yaakhoottiherye. Awo yaahihula iphareya, awo yaahiwiiva awanani aya ni ihasara, awo yaahaakhomela vamwiikimanyo awanani aya yaathara, ni yaahilapuwela muttetthe, nave nelelo khiyaawenrye okhalana waamini wira emurowele natiri.

¹⁵⁶ Yoxuwa ni Kalebi yaahikhalanasa waamini iwo! Awo yiirale, "Hiyo ninniweryaxa oxintta etthu p'itthu enrwa ohoolo wahu."

¹⁵⁷ Owo ti mulattu ni ekereja. Hiyo ninoowerya oxintta khula eretta. Hiyo nookhalana Owerya mwa hiyo. Hiyo n'ana axilopwana n'athiyana a Muluku, khiivo enwerya okhala ohoolo wahu. Etthu emosa paahi, Owo onthuna omphwanya mutthu onrowa waamini, ole onrowa waamini etthu Muluku owiirenly'aweni. Kahi hiyo *ninrowa* okhala; hiyo na yaawo naanaano va! Ni Mukhalelo mukumi voohimala wa Erooho ori ni hiyo. Amen! Eyo vo.

¹⁵⁸ Ti yeeyo enihimyaaka okathi olavunlyaaka mwaha voosiis'ula, *Maasi Ankhala Voohimala Vamwala*. Maasi ankhala voohimala Vamwala ari vaava naanaano, Maasi yaale ankhala voohimala a Mwala ole woomaniwa oKalvario. Okathi Erooho Yoowaarya eyo ekhumme aya mwa Yoowo oKalvario, yeeyo etthikenle Mukereja Nihiku na Pentekosite, Erooho Yoowaarya emosaru yeeyo eri vaava voosiis'ula. Ni Eyo yoonivaha natiri!

¹⁵⁹ Mwaha wa yeeyo, keettaka ohoolo w'aretta, okathi Owo okirumalyaawe iwe, miyo kinnaamini; Muluku ohimnye siiso! Ti siiso soowoona siniiraneyaaya; Muluku oolaiherya! Muluku khokhanle woothaka.

¹⁶⁰ Mwaamini! Muhaana waamini. Ehaana okhala Etthu vo, mutthukule evolohiheryo eyo, mutthukule etthu iyo wira muhiye evolowe. Etthu entthunaahu olelo kahiyo ovekela Owerya wunci-ene. Mookhalana Owerya woophiyerya wira mpattuxe elapo esya. Etthu entthunaanyu waamini wira murumeele Owerya iwo. Etthu entthunaanyu weettiherya ekumi iyo, n'ukhala makhalelo ooreera, wira mwanvekela Muluku etthu p'itthu, moosuwela! Hiyo nookhalana nrromelo wa Muluku, wa yeeyo. Hiyo noosuwela, hiyo naasukakaru Sooruma Sawe, Owo khonrowa onikhoottiherya hat'etthu yooreera wa hiyo, neetakaru ni Yoowo. Muluku eettaka ni hiyo. Oh, wulu!

¹⁶¹ Awo jaarina etthu emosa paahi yo wira. Awo jaarina etthu emosa paahi yo wira, eyo ti wii, otthara eyeettelo yeeyo. Kahi ohapuwela *nno*, ni ohapuwela *iwe*; masi otthara eyeettelo yeeyo!

Ekereja erina etthu emosa paahi yo wira, otthara eyeettelo! Awo yaahikhalana Nripu na Mooro, yaarinaaya wira ekhale eyeettelo yeeyo ettharaka Nripu na Mooro. Ti nenlo naahoolale. Etthu aya yaaweryaaya woona, naari Nripu nenlo na Mooro. Awo yaahoono Nlo nivaraka muteko mwa Moise, ni yaanisuwela wira owo aari muhooleli.

¹⁶² Olelo hiyo nookhalana Masu. Hiyo nintthara Masu. Ni hiyo ninnoona Masu evaraka muteko mw'alipa-oowaamini, ni noosuwela wira ti siiso, nto. Muluku avaraka muteko ni hiyo, alipiheryaka Masu ni ithoonyeryo sintthara! Hiyo ninkhala ni Masu. Masu ankumiherya iphwanyeryo.

¹⁶³ Awo yaahikhala ni Moise. Okhala wira, Nripu na Mooro, Moise aatthara Nenlo. Ni awo yaanithhara. Vapacenry'aya onvirikanya Moise, ni wiisinliha ni Muluku ni onvirikanya Moise, awo yaahihapuwela epantte emosa ni ekina. Mikattiyamiho khukela. Vekeekhai.

¹⁶⁴ Hiyo ninkhala ni Masu, ni Masu annikumiherya ithoonyeryo. Yesu ohimnye wira, "Ithoonyeryo iya sinimwaatthara ale anaamini Masu." Moone, eyo enkhala ni e... Nyuwo munkhala ni Masu, Masu anookumiherya ithoonyeryo. Masi, Moise, owo iirale exeeni?

¹⁶⁵ Awo yaarooopuwa, vano yiirale exeeni? Yaarooohiya ephiro, khwaapweteya evaheryo aya ya maasi.

¹⁶⁶ Miyo kinoona wira eyo t'ile ekereja yiiralyaaya olelo. Eyo eroohapuwa ephiro ya Soolempwa. Awo aroohapuwela ismu. Awo arookhuma ekelaka mwa itthu sikhani sahaarinaaya wira. Awo aroopaka itthu. Awo aroopaka itthu ntoko Waamini w'Arummwa. Muniphwanya vayi yeeyo mBibiliani? Awo ampanke katikeesi animusomaaya. Awo akhalinhe miromolelo ohiya musuwelelo. Awo apanke ovahana matata ohiya musuwelelo wooyariwa vasya. Awo akhalinhe otathela ohiya opatiiso wa mmaasini. Awo akhalinhe enamuna yootakhala, "Tithi, Mwaana, ni Erooho Yoowaarya," ehikhanle etthu ene eyo mBibiliani. Bibilia ohimnye wira, "Ni Nsina na Yesu Kristu!" Eri etthu emosa paahi yo wira mwaatthunaka Maasi ene yaawo, mutthikele-tho mphironi. Mutthikele e...Owo khokhumme; Owo nlelo ori vaava. Nyuwo munikuxa iyaaminelo omuhiya Kristu. Nyuwo muhapuwenle mmanyakunyakuni.

¹⁶⁷ Mmosa khwira, "Ahe, miyo ka Mmetotista."

Mukina oniira, "Miyo ka muPatista."

Eyo enooniherya wira khamuhiyo muKristu, nto. Hiyo n'a a Kristu! Hiyo n'a a Yoowo.

Nyuwo muniira, "Ahe, vakhala wira, miyo, muPatista?"

Vakhala wira mwa yeeyo paahi, weeso khamuhiyo a Kristu, nyuwo mwa muPatista.

Nyuwo muniira, "Ahe, miyo ka muPentekosite."

Nyuwo mwakhala muPentekosite paahi mwa muromolelo, ti yeeyo tu mukhanlyaanyu.

¹⁶⁸ Masi, mwakhalana-ru musuwelelo wa pentekosite! Nto Masu a pentekosite anookumiherya musuwelelo wa pentekosite! Mutthare etthu emosaru awiixutti ale yaatthanre aya, mukhale vaavo mpakha musareye Erooho Yoowaarya.

¹⁶⁹ Vano nto nyuwo mwaavaanyihaka Masu, erooho ele mwa nyuwo enrowa voovirikana n'ile Masu anihimyaaya, weeso kehiyo Erooho Yoowaarya. Ti xetwani ontakiherya Erooho Yoowaarya. Munnoona vatthu vaniphyaahu ni yeeyo? Oh, akina wa hiyo yaahilavula ilavulelo, hiyo naahikhalana ituphelo s'okhuwela n'itthu siiso, nave khukhootta itthu iya stothene sikina. Hiyo niroohiya itthu stothene sahaakhanle mwa Yoolempwa okela mukereja. Niphienrye vayi olelo? Nitthikenle othakoni okina, mutthenkeso woowuuma. Hiyo nrimwiitthokiha, khunipweteya Maasi ahu. Ti yeeyo Pentekosite iiralyaawe. Vapacenyawe wiitthokiha, oroopacerya ohonona opatthana, ni wira, "Ahe, vano hiyo khaninrowa opatthana, vakhala wira mutth'ula onaamini *yeeyo*."

¹⁷⁰ Mukeleleke ohoolo, mukhale ni yoowo mpakha ophiye mwa Masu a Ekeekhai, osuwela wa Ekeekhai. Enakhaleru etthu p'itthu, muhiye, khula enamuna. Mukeleleke ohoolo paahi, mukhale ntoko axinna.

¹⁷¹ Masi, oh, hiyo naahaana wiitthokiherya, ni wira, "Ahe, okhala wira nyuwo khamuhiyo Unisista, okhala wira nyuwo khamuhiyo a oPiili, wala a Oraaru, wala a *ola*, khaninrowa okhalana opatthana ni nyuwo." Vano hiyo naairaka yeeyo, hiyo nniira exeeni? Hiyo nnihokoloxerya-tho mothakoni. Ti yeeyo!

¹⁷² Masi, muupuwele, okathi Isarayeli okhumme awe mphironi, eyeettelo y'orowa muttethe wa natiri, Mwala khuwaahiyale; Owo waakhala vaavale, ni maasi nave. Ti siiso Erooho Yoowaarya, enikhala vaavo. Hiyo khanrina weettasa nitthikaka.

¹⁷³ Vano, va Muluku onniniixuttiha etthu yuulupale. Muluku onniniixuttiha va exuttero emosa. Kristu aavulalihiwe emaara emosa, onivahaka musuwelelo wa pentekosite, emaara emosa, wa othene. Vano, okathi Mwala ole omaniwaaya, Owo khiwaarina omaniwa emaara ekina. Owo waamaniwe emaara emosa paahi.

¹⁷⁴ Moise aahivonya mwaha wo omana emaara ya neenli, ooniheryaka otteettheya wo waamini wawe mwa Ettipiheryo. Masi okathi Kristu omaniwaawe emaara emosa, hiyo noosuwela wira Owo khaarina omaniwaka emaara ekina. Ahe, Moise aaira exeenii? Moise aakhaliha etthu esya, atthunaka opaka etthu esya.

¹⁷⁵ Nto ti siiso anamukuttho ahu yiiralyaaya olelo. Awo yeerenrye opaka etthu esya. "Hiyo nnimwiikhaliha Asempeleya a Muluku. Hiyo nnimwiikhaliha Ekereja ya Pentekosite ya

Muluku. Hiyo nnimwiikhaliha Ekonselyo ya Atthu othene. Hiyo nnimwiikhaliha *ela, ele, wala ekina.*” Eyo kahi ile Muluku iiralyaawe. Owo khuwaari muupuwelo Awe.

¹⁷⁶ Kristu aavulalihiwe emara emosa. Owo ti musuwelelo woopacerya. Eyo t’inamuna yoopacerya. Nihiku na Pentekosite, Petru iirale, “Murukunxe murima, khula mmosa a nyuwo, mpatisiwe mwa Nsina na Yesu Kristu.”

¹⁷⁷ “Hiyo nintathela mwa nsina ‘n’Atithi, Mwaana, Erooho Yoowaarya,’ nimpaka inamuna sothene sa iyaaminelo ni itthu sothene sikina sa Yeeyo.” Hiyo nakhumaru Mmasuni, khivanxankiha ohiweryaka ophiya hata nipuro. Munnona?

¹⁷⁸ Muluku onniixuttiha exutteryo. Khivaatthuneya Moise wira, “Vano ninrowa opacerya etthu esya va vano, vano nnimwiitthokiha ni ninoopaka ekereja Katolika.” Eyo t’itthu yoopacerya awo yiiralyaaya. Nnari, nto nuvira okathi vakhani, “Ahe, ninrowa opacerya etthu esya mwa yeeyo, hiyo ninoopaka Luteraana.” Nuumala khurwa Anklikana, vano nto aPatista, ni sikina, ni aKambellita, ni Ekereja ya Kristu, ni nwanani a Kristu, ni itthu sothene sikina. Moone, awo othene khurwa epaceryaka, mmosa nuumala mukina, mmosa nuumala mukina, epakaka miromolelo ni mitthenkeso. Eyo khiyaari yeeyo. Munnoonna vo etthu aniiraaya? Awo anoovulaliha-tho Mwala, wira epacerye etthu esya. Hiyo khanimphavela mwiixuttiho wa naanaano.

¹⁷⁹ Khula mutthu mBibiliani aapatisiwe mwa Nsina na Yesu Kristu. Khula mutthu mBibiliani aakhenle Erooho Yoowaarya, aarwiye mwa enamuna ya Muluku, voolikana ntoko Muluku sipakalyaawe wira ekhale. Awo yiirale etthu emosaru. Awo jaarina musuwelelo mmosaru. Ithoonyeryo imosaru saanaatthara. Miteko imosaru saanaatthara. Mwaha wa xeeni? Awo yaakhala mwaha wa Mwala. Awo yaakhenle Maasi mamosaru.

¹⁸⁰ Nto, olelo, etthu hiyo nikhalanenlyaahu iyaaminelo sinciene ni miromolelo, okhala wira nimpacerya etthu esya. Hiyo khanimphavela hat’etthu esya. Mutthike!

¹⁸¹ Moise khivaatthuneya omana-tho Mwala, opacerya etthu esya. Owo aahaana olavula n’awo, mwaha wa Mwala woopacerya. Oh, kinromela wira munniwa saana yeeyo! Moise aahaana olavula sa Mwala waamaniwe, woopacerya; kahi weererya omana-tho Yoowo, kahi weererya opacerya etthu esya, masi olavula ni Etthu ya khalayi!

¹⁸² Muluku, mukikhaliherye! Kakhwa vale masikhini, vapulpitu, kinoolavula sa Mwala woopacerya! Miyo kinoolavula sa musuwelelo woopacerya. Miyo kinoolavula sa Soolempwa soopacerya saavanhe opatiiso wa Erooho Yoowaarya, “Murukunxe murima, khula mmosa a nyuwo, mpatisiwe mwa Nsina na Yesu Kristu wira muleveleliwe itampi, nto munimwaakhela yoovaha ya Erooho Yoowaarya.” Okhala

vohimala wa Maasi anikhoowa Vamwala nlelo ori ni hiyo. Eyo enookumiherya etthu emosaru. Eyo enookumiherya soowoona. Enooruuha ovonihiwa. Eyo enooruuha olaleerya s'eprofeta. Eyo enookumiherya khula etthu awo yiiralyaaya.

¹⁸³ Okathi Isarayeli otthikenlyaawe okhala oratteene mwa Soolempwa, ni khuhokolowela mphironi, awo yaahirowa muttethe wa natiri. Masi saahaakuxa miyaakha miloko mixexe.

¹⁸⁴ Pentekosite onnikhalaka miyaakha soophiyaka miloko mixexe wala miloko mithanu, eettasaka mothakoni. Mutthikele Vamwala! Ori voowooneya. Ela eri va, yoolempwa vaava va Mmasuni. Erooho Yoowaarya eri vaava epakaka etthu emosaru Owo iiralyaawe kweekwe, vano Mukhalelo woohiyererya wa Maasi ori vaava. Mutthikele wa Yoowo paahi, mutthikele ele ya khalayi, yoopacerya. Yaari sayi mwa ele yoopacerya?

¹⁸⁵ “Ahe, awo yaahivahana matata ni mulaleyi?” Khiivo etthu ene eyo. “Awo yaapatisiwe mwa nsina ‘n’Atithi, Mwaana, Erooho Yoowaarya?” Khekhanle etthu iyo. Khaavo hata mutthu mBibiliani, nipuro pi nipuro, wala nuuvira miyaakha imiya tthaaru nuumala Bibilia, yaapatisiwe ni nsina “n’Atithi, Mwaana, Erooho Yoowaarya.” Eyo eyaaminelo y’eKatolika, kahi mwixuttiho wa Bibilia. Munnona?

¹⁸⁶ Awo yaahikhalanasa Erooho Yoowaarya. Ithoonyeryo iya saanaatthara ale yaamini. Eyo enimwiira-tho olelo. Mwala owo mukumixa ntoko sinkhalakaaya okathi wothene, Mwala yoole woomaniwa!

¹⁸⁷ Nihireke, “Ahe, vano nyuwo murwe mwiitakaihe ekerej’ahu ya Pentekosite, mukele eriyari ahu ya Pentekosite.” “Nnari, nyuwo murwe mwiitakanihe n’aPatista, wala Metotista, wala aPrespiteriyaano, wala aKatolika.” Exeeni iyo? Iwo omana Mwala emaara ekina, weererya opacerya etthu esya.

¹⁸⁸ Mwaaleele, “Murukunuxe murima, mpatisiwe mwa Nsina na Yesu Kristu,” wira eleveleliwe itampi saya, “ni ithoonyeryo iya sinimwaatthara ale anrowa waamini.” Vano nyuwo muntthikela mphironi, muntthikela Maasi mamosaru. Maasi mamosaru anoovaha eriiryelo emosaru. Anoovaha etharuxelo emosaru erutthu. Awo anoovaha owerya omosaru wo orapihiwa. Awo anoovaha owerya omosaru wo ovoniha. Awo animwiira etthu emosaru Awo yiiralyaaya okathi ule, hiyo natthikela-ru paahi Erooho emosaru.

¹⁸⁹ Ekumi vamwirini wa iwuuva enimwiimiha iwuuva. Vakhala wira ehiira mwaisana, enimwiima etthu emosaru mwaakha ola. Nlo nlamulo na Muluku. Nlamulo na Muluku ti wii, ola wakhala mwiri wa iwuuva, muhiye meekh’aya, owo onimwiima iwuuva. Nyuwo pooti okumaniha ni etthu ekina, masi nto muhiye meekh’aya nto onotthikela-tho okhala iwuuva imosaru.

¹⁹⁰ Vano hiyo nirookumanyiha ekereja ni ePentekosite, ni ePatista, ni eMetotista, ni ePrespiteriyaano, ni—ni Anklikano,

ni khula enamuna ya ismu. Muhinihiyerya-ni mmansaya? Mutthikele Vaviteerani, eyo enoothikela Owerya omosaru. Amen! Amen! Okisivela yeeyo.

¹⁹¹ “Opacerya etthu esya.” Etthu emosaru hiyo niiralyaahu. Kahi ophavela wooniherya owerya wahu. “Totori *Lexe ni lexe* ti mulipa-oopaceriha ekereja yuulupale *Lexe ni lexe* ekereja ya *lexe ni lexe*.” Khiyaari yeeyo.

¹⁹² Ti yeeyo Moise aahimyyaawe, “Miyo kinoowooniherya etthu enweryaaka wira. Miyo kinooruuha, khula enamuna!” Owo aahimana, khuhirwa. Owo khukhuwela-tho, “Kinimooniherya etthu ekhanlyaaka wiiraka!” Muluku aahivara muteko ni yoowo mwaha wa yeeyo.

¹⁹³ Muhuupuwele, wira “mwavarelela muromolelo paahi.” Muluku onowaakhulihani yeeyo. Eyo ekeekhaii voolikana. Muhaana otthikela ele yoopacerya. Mutthike.

¹⁹⁴ Mulavule paahi n’atthu. (Muhaaleele wira, “Murwe mwiitakanihe ni ekereja ahu. Nyuwo muromole eyaaminelo ahu.”) “Nyuwo mutthike murukunxe murima, mpatisiwe mwa Nsina na Yesu Kristu, wira muleveleliwe itampi sanyu; nto munimwaakhela yoovaha ya Erooho Yoowaarya, murim’anyu wakhalaru saana. Ni ithoonyeryo iya sinimwaatthara alipa-oowaamini. Nikhuru n’alipa-oowaamini, ithoonyeryo iya sinoorowa ni yaawo.” Mwaha wa xeeni? Mwala, Mwala woomaniwa ni Maasi Awe a Ekumi anookhoowa, ekumiheryaka etthu emosaru Owo iiralyaawe wu. Eyo ti yoohitthyaweya. Oh, ayo.

¹⁹⁵ Hiyo ninthuna nooniherye, ni wira, “Hiyo n’a aMetotista, ni aPatista.”

¹⁹⁶ Mulavule ni Mwala paahi, Okhala Wawe ti voohimala. Muheererye wiitakanxa ni Yoowo. Miyo “kaahiitakanxa” nno. Muheererye wiitakaniha Memmo. Khimukhanle wiitakaniha ni Yeela, eyo ti yoowooneya saana. Nyuwo munoowerya wiitakaniha n’aMetotista, munoowerya wiitakaniha ni aPatista, munoowerya wiitakaniha ni aPentekosite, munoowerya wiitakaniha mAnklikano, masi khivanweryaneya nyuwo wiitakaniha ni Yeela. Nnari. Nyuwo muhaana osarihiwa Yeela. Muhiitakanihe Eyo; mukhale oosareya Yeeyo paahi. Ti yeeyo tu. Ti osareya exeeni? Osareya Owerya, osareya Erooho, osareya Ekumi, osareya ohakalala, murettele, ovilela, oreera murima, othunku, Owerya wa Erooho Yoowaarya mmakhaleloni mwanyu, maana Mukhalelo wa mahiku othene ori vaavo. Muupuwele.

Kihaana omaliha okhala wira vanooxa.

¹⁹⁷ Masi, muupuwele, Mwala ole khonatoko waahiya. Owo khonatoko waahiya. Ni Kristu khonkhalakhala onihiyaka; Kristu ohimye wira, “Miyo kinookhala ni nyuwo mahiku othene, mpakha omala olumwenku.” Eyo ekeekhaii? Nto Mwala ole waahikhala ni yaawo ephiro yothene okhuma Horepe

mpakha Neepo. Yaari siiso. Vaphiyalyaaya oYordani, Owo nlelo waari weiwe. O Muluku, kintthuna koone Yoowo oYordani!

¹⁹⁸ Moise, okathi waaryaawe oYordani, Mwala waari ni yoowo okathi wothene. Vano owo eemenle osulu iwe, awehaka vathi ni—nikhuru n’atthu yaatthikenle ottuli khukhuma wa Muluku. Murim’awe waaninkheliwa ni yaawo. Vano owo aahiweha oYordani. Owo aari oYordani. Yordani, a muroohoni, miyo kinimuhimyaaka. Nto owo aaphwanyaneya, eemenle vale, okhwa waawela moonno awe. Masi owo aahiweha, oryeene vale mpararini mwawe nto vale waaphwanyaneya Mwala. Owo aaroowela paahi Vamwala, vano Malaikha khurwa, khimukuxa.

¹⁹⁹ “Miyo nkinoohiyani nnakhala woonyanyalani.” Hata wira okathi onrika sayi, munnuwelo xeeni onkhalanaahu, ekhwelo xeeni enkhwaahu, muupuwele, Mwala onookhala weiwo oYordani. Owo khonrowa ohiya wala onyanyala. Muupuwele yeeyo paahi. Okhala voohimala wa Maasi a Vamwala onookhala ni hiyo ekumi yothene, ni hata oYordani.

²⁰⁰ Nrowe nuuramihe muru. [Munna mmosa onooleerya—Mol.]

²⁰¹ Okathi Erooho eyo eneettaaya eriyari ahu, Erooho ya Muluku yeettaka eriyari ahu, yaamukhala va ale voosiis’ula ahimmusuwela Kristu, ni nyuwo mu—nyuwo muhikhanle vakhiviru ni Mwala owo, muhilavunle ni Yoowo voosiis’ula? Masi nyuwo moosuwela wira Owo ori vaava. Munniweha Owo ovaraka muteko mapuro othene, omoona Owo eetteettaka, woona Owo weetteettaka varyari v’atthu. Owo Mukhalelo voohimala wa Maasi. Iwo woopowa. Eyo ti Erooho eneettiherya ensariha ikahi saya mpakha nipuro awo ahinweryaaya omaala-tho, etthu ehaana okhumelela. Ni nyuwo mwaahimusuweleke Owo, mwaamutthuna ovenxa ntata mwiire, “Mukivekelele, Munna Branham. Vano kintthuna kimusuwele Yoowo. Ni kintthuna olavula ni Yoowo, ni kintthuna kimusuwele Yoowo mwa omalela wa Erooho Awe. Kintthuna kisuwele wira Owo ori vaava vakhiviru vaka, okathi wothene. Kookupali wira Owo ookhala. Masi kintthuna kivaanele-no. Ni miyo koovoliwa nthona, ni koovoliwa etala mwaha wa Muluku. Miyo kintthuna kimusuwele Owo oratteene?”

²⁰² Muluku ooreeriheni, mulopwana. Ni Muluku ooreeriheni, mulopwana. Ni nyuwo, munna. Nyuwo, ayo, ottuli saana wu. Va, muhano, ayo. Ayo, muhano. Hiyo ninnoona matat’anyu, ni Muluku onnoona. Muluku ooreeriheni, mmiravo. Muluku ooreeriheni. Ni nyuwo, muhano. Amen. Muluku ooreeriheni. Ooreeriheni, munna. Mutthu mukina vano, okathi woomaaleleya. Muluku ooreeriheni, ottuli iwo, mmiravo.

²⁰³ Muupuwele yeeyo. Muupuwele yeeyo, Mukhalelo voohimala wa Maasi a Vamwala, Erooho emosaru yeeyo; Owo aakhuwenlyaawe iwe nihiku no olamuliwa wa Yoowo, okathi Owo aakunxaawe olamuliwa wahu. Ni ekopo ya oviruwa wa

Muluku khummana Yoowo, vano itampi sanyu saahuupanyeriwa vakoponi vaavale, vano khummana Owo, nto Ephome Awe ni maasi yaahivuuva ekhumaka mwa Yoowo. Owo khwira, “Tithi, mmatatani mw’Anyu Miyo kinnivahererya Erooho Aka.” Nto Nihiku na Pentekosite, Eyo khurwa wira eroweke ni hiyo neettaka mukwaha. Ni Eyo eri vakhiviru saana vano.

204 Khimwaatthuna ohimya wira, “Nkireere weettasa voorakamela owaani, Pwiya, kinimoorwa owaani”? Niipaka nenla, mwaamutthuna orowa waltaari ni ovahererya-tho, nave, munepa anyu, wa Kristu? Amen.

Koomurakamela Muluku, (Ottaiwene
w’ephiro.)

Vano miyo kinoorwa owaani;
Ephiro ya (Ohaamini, moone.) nkireere weetta,
Pwiya, miyo kinoorwa owaani.

Kinoorwa owaani, kinoorwa owaani,
Nkinthikela-tho weettasa;
Mutaphule saana miyoono Sanyu sa mphento,
Vano, Pwiya, kinoorwa owaani.

205 [Munna Branham onipacerya wiipa muhina-vathi *Pwiya, Kinoorwa Owaani*—Mol.]

206 Aximiravo araru anoomalaru orwa, yaakuvaka saana, maithori mmaithoni mwaya, aakokhorasa epantte ya waltaari. Vekeekhai, awo aalevelesiwa. Awo aalevelesiwe hata ehinatthi okhuma vaakilaanthe aya, okathi muupuwelo aya mwaamukhaani olakenlyaaya. Aroorwaasa paahi ohoolo khukokhora va, wira yaasuwelehe atthu, epantte xeeni awo arisaaya, voosiis’ula.

207 Kuupuwela wira yaamukhala atthu aalweene yaatthuna wira yeela, okokhora paahi, ni wira, “Pwiya, miyo—miyo nkireere weetta ottaiwene w’ephiro. Miyo kinnikhalanaka ohoverya wunci-ene, ni imaara sikina miyo kookhuma khukela mutampini. Vano miyo—miyo kintthuna kitthike vahinatthi olekela. Muluku, miyo—miyo kaanithuna orwa. Vekeekhai kaanithuna orwa kikokhore.” Amen.

208 Vano, aana axithiyana a Arthur Beam, ntoko a munnuwelo mmosa, awo ahoorwasa va, aakokhorasa.

209 Ohoolo nno onrwa mwaana mwamuthiyana onammalaru omwaakhela murokor’awe mwaamukhaani owaani. Nihiku nlo miyo kaarookilaathi; Muhano Wood khurwa khukihimeerya, khwira munn’ola aarowa oxipiritali wira akhalane mwaana. Erooho Yoowaarya khuhimya wira, “Murowe mwaahimeerye wira onrwa okhala mwaana mulopwana.” Okathi oyariwaawe, aari mwaana mulopwana.

210 Enikhala ntoko aana voosiis’ula, axinamwane axilopwana ankhuma munikhuruni mwa Munna Arnold muthiyana,

anvahererya makhalelo aya. Altaari othene, moono aka woolopwana, t'osareya axinamwane.

²¹¹ Yaamukhala yooreera naaipale nsipo, altaari, w'atthu akina, aalweene.

Vano, Pwiya, kinoorwa owaani.

Kinoorwa owaani... (...?. ...)

Nkintthikela-tho weettasa;

Mutaphule miyoono Sanyu sa mphento,

Vano, Pwiya, kinoorwa owaani.

²¹² Nrowe nuurame muru okathi vakhani paahi, wira naavekelele, axikhaani ala.

²¹³ Tithi a Wirimu, wakhalaru meelo, Yesu apisaru mwa miyaakha sikina muloko wala muloko ni mithanu, ala anrowa okhala amiravo n'axiruusi anrowa okuxa Mutthak'ola aroiha maloko makina anrowa orwa. Nkinihoverya mmuruni mwaka, Pwiya, wira mahiku othene a ekumi aya awo anoorowa wuupuwela erwaaka waltaari nno. Ni awo maniya makhaani, Pwiya. Mirima saya sikhaani ni soowoolowaseya sihoona okupalihwi voosiis'ula. Hata khayiwanse Mutthaka wothene; anoomalaru okhuma musaala, vaamwiiwaaya Munna Arnold muthiyana alavulaka; khurwaasa othukumana waltaari nno, evahereryaka makhalelo aya wa Nyuwo.

²¹⁴ Vano, Tithi, miyo kinoomalaru ohimya wira mwa hiyo ennikhala Erooho Yoowaarya. Ni Erooho Yoowaarya ela, waamini ni Erooho yeela, onniira itthu sothene. Ni kinnaamini wira okathi ene yoola, Nyuwo munnilevelela khula etampi awo yiiralyaaya. Ni kinoovekelani Nyuwo, ni waamini wothene ori mmurimani mwaka, wira Nyuwo musuke ikumi saya sikhaani mphironi. Wira awo ahikhume ehiyaka Ephiro.

²¹⁵ Ela vekeekhai etthu yootikiniha. Erooho yoohimya voosiis'ula, wira "naamoona etthu yootikiniha." Muluku, Nyuwo mwahiyaru ovara muteko n'akina, nwaakhele axinamwane. Moota voosiis'ula, wihana wa waltaari, ohikhanle aya hata mulweene mmosa, masi nikhuru nothene n'axinamwane ti nirwiiye. Onaamwi, waari Mutthaka muulupale wo olipa wiiwa saana, hata wa aalweene, masi anamwane aavara Erooho ya Yoowo. Hiyo ninnooxukhuruni Nyuwo mwaha wa yaawo, Tithi. Miyo kinnaavahererya awo wa Nyuwo, ntoko murumeyi Anyu, ntoko itthuvo sa muthukuman'ola; maana, nuupuwelaka wira Mukhalelo voohimala wa Maasi a Ekumi anookhwalala ni yaawo okathi wothene ankhalaaya akumi. Awo ekhalane waamini etthu eniiraneya, wira Muluku yoole aakuminhe vakhaterani khwaaruha osulu nno, awo emwaaminiki Muluku yoowo mahiku othene a ekumi aya. Wira irooho saya sikhaani siruuihiwe wa Nyuwo nihiku na okhwa waya; sitthikelihwiwe mw'erutthuni mwaya nihiku na ohihimuwa. Awo t'Awinyu, Tithi. Hiyo ninaavahererya wa Nyuwo mwa Nsina na Yesu.

216 Nuuramme-ene muru. Kinrowa waavekela anamwane ala othene waltaari, anaamini wira Yesu ti Moopoli anyu ni Ole oohimenryeni, ottuli iwo vamuthukumanoni, arwiiye nno okokhora waltaari nno. Munnaamini wira Yesu onnoophentani ni onnilevelela itampi sanyu? Kintthuna wira nyuwo othene nvenye mweemele nwehe va vamuthukumanoni. Ela, eyo t'inamuna nyuwo mukhanlyaanyu waahimeeryaka atthu wira munnaamini wira Yesu onniwoopolani. Vano nvenye mweemele, ti yeeyo, nto nwehe ottuli vamuthukumanoni. Nyuwo othene aximiravo n'axiruusi munimpenta Yesu, nvenye nwehe muthukumano iwe, nyuwo othene.

217 Ankhi nyuwo axiruusi ohoolo nno? Munnaamini? Munnimpenta Yesu? Axiruusi ala va, nyuwo munnimpenta Yesu ni murim'anyu wothene? Munnimpenta? Munnimpenta Yoowo? Munnimpenta Yoowo, oophentiwa? Mweemele va, mwaahiye atthu esuwele wira nyuwo munnimpenta Yesu. Muluku ooreeriheni.

218 Vano nrowe nirukunuwele epantt'ila *nno* niwiipele atthu ala nihinatthi orowa, "Yesu onnikiphenta! Miyo kinnisuwela saana, Bibilia onikileela siiso." Munnona? Nrowe nivenxe matata paahi okathi oniipaahu yeeyo vano. Vaareera, nrowe niipe.

Yesu onnikiphenta! Kinnisuwela saana,
Maana Bibilia onikileela siiso;
Axikhaani t'awawe Yoowo,
T'otteettheya . . .

219 Vano ni matat'anyu osulu . . .? . . . Othene ahu vamosa:

Ayo, Yesu onnikiphenta,
Ayo, Yesu onnikiphenta,
Ayo, Yesu onnikiphenta,
Bibilia onikileela siiso.

220 Vano nyuwo othene mutthikeleke ni miyo: Miyo kinnaamini wira Yesu Kristu ti Mwaana a Muluku. Olelo, miyo kinnimukupali Owo okhala Moopoli aka. Okhuma olelo, mpakha ohoolo, miyo kinooophenta Owo ni omurumeela Yoowo. Amen.

221 [Munna Ben Bryant oniira, "Munna Branham, kookhalana aana axexe vamurimani vaka okathi ula. Mwaamuwerya waavekelela xontte?"—Mol.] Vekeekhai, Munna Ben.

222 Tithi a Wirimu, mulopwan'ola onnoona wira axinamwane akina anrwa wa Kristu, vano owo onoovekela, ntoko tiithi, mwaha wa axinamwane awe. Ni Erooho yaaruuhale axikhaani ala mpakha waltaari, Erooho yeeyo emosaru ewoopole an'awe, Pwiya. Munvahe. Hiyo ninnaavahererya wa Nyuwo, Tithi, mwa Nsina na Yesu Kristu.

223 Vano nyuwo axinamwane murowaka vakhaterani vanyu, kintthuna wira othene ethataanelo eyo evahane matata n'axinamwane ala, wala yaakwannye awo yaatthikaka.

Othene mutthikele mukhaterani mwanyu, *nno*. Ni othene iwo yaakwanye vakhani axikhaani awo. Ni hiyo ninnoophentani nyuwo ni murima wothene. Nyuwo mwa mamempuru a Erutthu ya Kristu, mwa Yeeyo ntoko hiyo akina.

Hiyo ninrowa oSiyoni,
oSiyoni, wooreera saana;
Hiyo ninrowa oSiyoni,
Muttetth'ole wooreera wa Muluku.

Murwe nno, hiyo ninaaphenta Apwiya,
Ni ohakalala wahu osuweliwe,
Ni oruma wooreera wo ovuwiha,
Ni oruma wooreera woovuwaha,
Orukurerya Ehice ya Muluku,
Nto orukurerya . . .

Iwo wiipa wooreera! Nrowe nivenxe matata vano.

Hiyo ninrowa oSiyoni,
oSiyoni, wooreera saana;
Hiyo ninrowa oSiyoni,
Muttetth'ole wooreera wa Muluku.

Nrowe nivahane matata mmosa ni mukhwaawe niipaka vano.

Hiyo ninrowa oSiyoni,
oSiyoni, wooreera saana;
Hiyo ninrowa oSiyoni,
Muttetth'ole wooreera wa Muluku.

²²⁴ Vano nrowe nivenye nuuramme-ene, okathi hiyo . . .
Murumihe Munna Teddy, paahi . . .

²²⁵ Kokhalana sovekelala kamosa-kamosa va, ni maleeso ni sikina. Siiso akhumme ene ilapo s'okhopela. Billy aamukileela wira saahikhala ipoota sikhaani sa ttutthu wInklatera, owunnuwa so, mwaamukhaani ororakala othene. Vano nto hiyo naahaana onvekelela yoowo, nave.

²²⁶ Nto vano . . . [Munna Ben Bryant oniira, "Munna Branham, xontte mukilevelele mwaha wo wooahaaxani, masi nvekele wira, ole omanne ekaaro ahu nsana ohiyu, eparaxooke aka ya moonoo woolopwana, nvekele wira eyo yuupululiwe. Nvekele wira Apwiya yuupulule."—Mol.] Amen, Munna Ben, miyo vekeekhai kinimwiira yeeyo. [Munna Branham onipacerya oniipa muhina *Hiyo Ninrowa Osiyoni*.]

²²⁷ Neettaka, Pwiya, hiyo noosuwela wira Mwala woomaniwa ori vamosa ni hiyo, Mukhalelo voochimala wa Maasi a Vamwala onrowa ni Ekereja. O Muluku Ohinimala, munitaphulele hiyo, voosiis'ula, omwaamini Muluku ula ori ni hiyo. Miyo koosuwela wira Nyuwo munimwiira, wira niwerye ophwanya ocaliwa ni Nyuwo, wira Nyuwo muniroromele ni Yaawo. Nyuwo

mwaanivahale voowaattaxa, naamurumeela voohiloka, Pwiya. Masi naphwanyaru mahala ni Nyuwo, mutthuniherye yiiraneye.

228 Munn'ihu ohimnye wira mutthu oroomana ekaaro awe. O Muluku, hiyo noosuwela wira mulopwan'owo khorina musurukhu wo wira itthu iya. Kinvekela wira Nyuwo mmuruuhe mutthu owo vathi va okupali, wala etthu, wira ainiwe murima mwaha wo wira yeela, orwe, aire, "Munna, miyo kinooreeriha ekaaro anyu, ti miyo." Mmukhaliherye Munna Ben ni oophentiwa awe.

229 Va amphwanyaneya mmatatani mwaka maleeso ni soovekela, awo animwaamini Muluku yoowo. Moise aahimwaamini Muluku yoowo, vano owo aahilapuwa ephareya. Daniyeli aahimwaamini Muluku yoowo, khukumihiwa mulittini mw'akharamu. Satrakhi, Mesaki, ni Apeti-neeko, yaahimwaamini Yoowo, khuttihi mooro.

230 Paulo aahimwaamini Yoowo, nto nihiku nimoso okathi miteko saaryaaya soorika saana ni Paulo khaawerya waaphiyerya atthu othene, owo aakunxe nleeso paahi, owo khwira, "Miyo kinnaamini wira Muluku ori ni miyo." Owo khwiixaatherya matata vasulu va maleeso ni ikuwo, vano iroho sootakhala saanaahiya atthu, ni iretta ni ikwerere saahikhuma mwa yaawo. Muluku, miyo kinnimwaamini Muluku yoowo. Yootakhala ekhume. Eretta, ikwerere, ni mixankiho, saahiye, Pwiya.

231 Nyuwo mwa Muluku mmosaru yoole aalavunle ni miyo ohitto iwe Munripuni na Moro mme, ohitto omurathhini. Ti Nyuwo murina elatarato Anyu ethomeiwe-ene va ni miyo, vaxirini. Nyuwo muri ni hiyo, Pwiya. Nyuwo munkhala voohimala, Nripu nenle na Mooro. Ni ninnipuha Maasi a Vamwala khula nihiku, okathi onhakalalaahu mwa Erooho. Vano, Nyuwo muri vaava. Hiyo ninnooromelani Nyuwo, Pwiya. Hiyo ninniwaaminini Nyuwo. Hiyo ninnaamini wira Nyuwo munoonittikitthela ni onikhaliherya. Kahi wa ovuwa wahu, Pwiya; hiyo naamukhala ntoko Moise okathi iiralyaawe etthu yoovonyeya. Hiyo ninthuna niire etthu wira nookhaliheryeni, Pwiya. Iwo p'utthuna wa murima ahu, wookhaliheryani, nawerya-ru wira. Munoonihe, Tithi, etthu p'itthu Nyuwo entthunaanyu wira niire.

232 Nto vano, mwa eyiirelo yo waamini, miyo kinnipwapwela eretta maleeso ala anthoonyeryaaya, ni soovekela iya. Iyo sinimwaahiya atthu. Miyo koosuwela wira Nyuwo munimwiira, Pwiya. Miyo kinnaamini, mmurimani mwaka, wira Nyuwo munimwiira. Nvonihe iretta sothene eriyari ahu voosiis'ula.

233 Nwoopole ale avenxale matat'aya, ahimnye wira yaanithuna orwa Vamwala, mwaha wa Maasi. Muluku, awo evolwiwe nthona saana olelo, ekhale makhalelo oolukiwaxa

mwa yaawo, mpakha anrowaaya owiiriha awo ovoliwa ntthona mwaha wa Kristu. Munivahe.

²³⁴ Mukhale ni hiyo ohiy'ula, Tithi. O Muluku, mukitthuniherye kisuwele, mwa sookoha iya, ele eri mmurimani mw'atthu. Yaahikhale-ru etthu mmurimani mwaya, nto, Pwiya, Nyuwo mukivahe etthu wira kilaleerye mirima saya ohiy'ula.

²³⁵ Mmureerihe Munn'ihu Neville, n'amwaar'awe, amusi awe; ekerej'ahu yaamukhaani, maatiministratoore ahu, matiyaakono ahu, mamempuru ahu. Ni Erutthu Anyu mapuro othene, mukhale ni hiyo, Tithi. Hiyo ninnivahererya ela mmatatani mw'Anyu, mwa Nsina na Yesu Kristu.

. . .Siyoni;
Ninrowa oSiyoni,
Muttetthe wooreera wa Muluku.

Vano rowe nimwiipele Yoowo, oratteenexa, vekeekhai vano. Munnona?

Murwe, hiyo ninnaaphenta Apwiya,
Ni ohakalala wahu osuweliwe,
Ni oruma wooreera woovuwaha,
Ni oruma wooreera woovuwaha,
Orukurerya Ehice ya Muluku,
Orukurerya Ehice ya Muluku.

Ni mirima sahu soowuurama vano.

Hiyo ninrowa oSiyoni,
oSiyoni, wooreera saana;
Ninrowa oSiyoni,
Muttetthe wooreera wa Muluku.



MAASI ANKHALA VOOHIMALA VAMWALA EMK61-0723M

(The Ever-Present Water From The Rock)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku voosiisu, mahiku yeettaka 23 mweeri wa Julho, 1961, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org